

四庫全書

史部

欽定四庫全書

史部

通典卷七十四至  
六

詳校官侍郎<sub>臣</sub>李封

編修<sub>臣</sub>程嘉謨覆勘

覆校官助教<sub>臣</sub>吳省蘭

校對官助教<sub>臣</sub>金學詩

謄錄監生<sub>臣</sub>謝蓮鶚

欽定四庫全書

通典卷七十四

唐

京兆

杜佑

卿

撰

禮三十四 賓一

自古至周天下封建故盛朝聘之禮重賓主之儀天子諸侯卿大夫士禮數服章皆降殺以兩秦皇帝蕩平九國宇內一家以田氏篡齊六卿分晉由是臣強君弱終成上替下陵所以尊君抑臣置列郡縣易於臨統便俗

適時滯儒常情非今是古禮經章句名數尤繁諸家鮮  
釋注疏龐雜方今不行之典於時無用之儀空事鑽研  
競為封執與夫從宜之旨不亦異乎

天子受諸侯藩國朝宗覲遇

殷周以前天子有迎勞享燕諸侯之禮至

秦罷侯置守無復古儀及魏以三國分裂粗有其禮東晉末又廢泊梁崔靈恩採摭三禮遺文咸序其儀唯後梁主蕭譽歸稱帝荆襄為後周及隋附庸國覲採摭周制初立儀注焉○時會

殷同附○唐

東晉後周

虞

夏

殷

周

魏

晉

唐虞夏氏之時四方諸侯歲一朝○殷制五年一朝○

周制大行人掌大賓之禮及大客之儀以親諸侯

賓要服以

內諸侯也大客謂其孤卿

春朝諸侯而圖天下之事秋覲以比邦國

之功夏宗以陳天下之謨冬遇以協諸侯之慮

此以王見諸侯

為文也圖比陳協皆考績之言

天子當展而立諸侯北面而見天子曰

覲天子當宁而立諸公東面諸侯西面曰朝

爾雅曰戶牖之間謂

之展門屏之間謂之宁

邦畿方千里其外五百里曰侯服歲一見

又其外五百里曰甸服二歲一見又其外五百里曰男

服三歲一見又其外五百里曰采服四歲一見又其外

五百里曰衛服五歲一見又其外五百里曰要服六歲

一見

要服蠻服也此六服相距方七千里公侯伯子男封焉其朝貢之歲四方各四分趨四時而來或朝

春或宗夏或覲秋或遇冬每朝觀皆有貢物其賦稅見上篇

九州之外謂之蕃國代

一見各以其所貴寶為贄

九州之外夷服鎮服蕃服按曲禮曰其在東夷北狄西戎

南蠻雖大曰子父死子立其嗣王即位乃一來各以其所貴寶為贄則蕃國之君無執玉瑞也

到天子

之境先謁闕人闕人報王王使小行人迎勞於畿又使

大夫致積及郊使大行人服皮弁用璧以勞授之

皮弁者天

子之朝服璧無束帛者天子之玉尊也諸侯賓王使者用束帛乘馬積音子四反

及國天子賜

舍使司空致舍將受朝上公執桓珪九寸纁藉九寸衮

冕九章其春夏朝宗各乘所受上輅建常九旒繁纓九

就

若春諸侯各服裋冕釋幣於禰各乘所受上輅者以陽氣仁恩尚文故車服得與王同

侯執信

珪伯執躬珪七寸纁藉七寸驚冕七章建常七旒繁纓

七就子執穀璧男執蒲璧皆五寸纁藉五寸毳冕五章

建常五旒繁纓五就王則服皮弁於路門外正朝當宁

而立諸侯改服於舍服朝服各執瑞玉至於朝公東面

諸侯西面伯子男從侯而朝末儉承命告於天子天子

曰伯父寔來予一人嘉之伯父其入予將受之

天子於同姓大

國則曰伯父小邦則曰叔父異姓大國則曰伯舅小邦則曰叔舅嘉之者美之也受玉先書同姓次及異姓上

賓又傳下至審夫也信音身

諸侯序進入門右坐奠珪再拜稽首

入門

右而執臣道不敢由賓客之位卑者見尊莫贊而不授

賓者謁

謁猶告也上賓告以天子前辭欲親

受之如賓客也其辭曰伯父其升

侯氏坐取珪升致命王受之玉侯氏

降階東北面再拜稽首賓者延之曰升升成拜乃出各

還其舍司几筵設黼宸於廟宸前南嚮設莞席紛純加

繅席畫純加次席黼純左右玉几

斧謂之黼其繅白黑采也以絳帛為質宸

制如屏風繡似斧形展前設席左右有几優至尊也鄭  
玄謂紛如綬有文而狹者纁席削蒲翦展之編以五采  
若今合歡矣畫純畫為雲氣也次席桃枝席有次列成文  
天子服袞冕負黼展而立

諸侯裊冕一一而入以行三享奉束帛加璧庭實唯國

所有

唯國所有或馬或虎豹之皮龜  
金丹漆絲纁竹箭分為三享矣

奉束帛匹馬卓上

九馬隨之中庭西上奠幣再拜

卓猶的也以素的一馬  
為上書其國名後當識

其所產也必十匹者不敢  
斥王所乘用成數敬也

其秋冬覲遇之時將朝之早

諸侯裊冕釋幣於禰

將朝質明時也裊之謂言卑也天  
子六服大裘為上其餘為裊以事

尊卑服之而諸侯亦服焉其釋幣如聘  
大夫將受命釋幣於禰之禮告將覲也

皆乘墨車載龍

旂弧韞瑞玉有繅至大門外

交龍為旂諸侯所建墨車大夫制也弓衣曰韞

上

儼自與諸侯相揖而入至廟門外之舍王服衮冕負斧  
扆而受朝享之禮諸侯入門右皆奠玉再拜王命將受  
之諸侯更取玉升堂致命王親受之諸侯降堂又再拜  
稽首儼者延之曰升升成拜乃出然後行三享玉王皆  
撫之諸侯降堂自授宰如朝宗之法覲遇之時天子不  
下堂

禮記云天子覲諸侯下堂自夷王始也

其朝宗覲遇行朝享禮畢

三享

也諸侯皆右肉袒於廟門之東乃入門右北面立告聽

事

右肉袒者刑宜施於右也告聽事者告王以國所用為罪之事

儻者謁諸天子天子

辭於侯氏曰伯父無事歸寧乃邦

謁告也

侯氏再拜稽首

出自屏南適門西改袒還襲遂入門左北面立王乃勞

之再拜稽首儻者延之曰升升成拜降出

王辭之不即左者當出隱

於屏而襲也天子外屏勞之勞其道路勞苦也

王遂更延諸侯入而禮之王使

宗伯以珪瓚酌鬱鬯裸之禮畢還館諸侯公卿皆就館

見之若有功者天子賜以車服皆使公就館致之諸侯

迎於外門外再拜諸公奉篋服加命書於其上升自西

階東面太史居右

言諸公者王同時分命之而使賜侯氏

侯氏升西面立

太史述命

讀王命書

侯氏降兩階之間北面再拜稽首

受命也

升成拜

太史辭之降也

太史加書於服上侯氏受

受篋服也

使者出

侯氏送再拜時會以發四方之禁殷同以施天下之政

其法諸侯既至天子之國必先朝天子於其國內然後

為壇於國外更行朝禮

時會無常期諸侯有不順服者王將有征討合諸侯而發禁令

焉禁謂九伐之法也會之法為壇於國外崔靈恩曰古者諸侯朝天子四時禮外有時會殷同之法殷同者十

二年王不巡狩則六服諸侯各當方面來赴四時見王也殷衆也四方諸侯衆來見王此有十二年之期故不

得謂時會也殷同之禮東方則以春南方則以夏西方則以秋北方則以冬皆如巡狩之時春為壇

於國東夏與秋冬各於其方壇制度已具巡狩篇將時會殷同之

朝天子乘龍馬八尺載大旂象日月升龍降龍春則拜

日於東門之外夏則禮日於南門之外變拜言禮者客祀也秋則

禮月與山川丘陵於西門之外冬則禮月與四瀆於北

門之外禮者謂祭之巡狩之時山川之神各當方而祭之今不巡狩故山川隨其時而祭之陽祭陽方

陰祭加方明於壇上而祭之方明者木也方四尺設六色東青南赤西白北黑上

玄下黃四方神明設六玉上珪下璧南方璋西方琥北

之象所謂方明也

方璜東方珪以祭之

六色象其神六玉以禮之上宜以蒼璧下宜以黃琮而不以此者則

上下之神非天地之至貴者設玉者刻其木以著之

去方明以朝諸侯

其朝位授玉儗介之

儀已具巡狩篇

○魏制藩王不得朝覲明帝時有朝者皆由特

恩不得為常○晉武帝太始中有司奏諸侯之國其王

公以下入朝者四方各為二番三歲而周周則更始臨

時有故則明年來朝明年朝後更滿三歲乃朝不得依

恒數朝禮皆執璧如舊朝之制不朝之歲各遣卿奏聘

詔可○東晉王侯不之國其有受任居外則同方伯刺

史二千石之禮亦無朝聘之制○後周初梁主蕭譽來朝入畿大冢宰命有司致積其餼五牢米九十筥醯醢各三十五甕酒十八壺米禾各五十車薪葛各百車既至大司空設九儐以致館梁主束乘馬設九介以待之禮成而出明日梁主朝受享於廟既致享大冢宰又命公一人玄冕乘車陳九儐以束帛乘馬致食於賓及賓之從各有差致食訖又命公一人弁服乘車輶設九儐以勞賓梁主設九介迎於門外明日朝服乘車還輶於

公公皮弁迎於大門授贄受贄並於堂之中楹又明日  
梁主朝服設九介乘車備儀以見於公事畢公致享明  
日三孤一人又執贄勞於梁主明日梁主還贄又明日  
梁主見三孤如見三公明日卿一人又執贄梁主見卿  
又如三孤於是三公三孤六卿人各餽賓並屬官之長  
為使牢米帛同三公

自秦平天下朝覲禮廢及後周立  
蕭譽為梁主稱藩國始有此儀

○隋文帝開皇四年正月後梁主蕭歸來朝

歸父譽自  
梁入周以

襄陽來為附庸國於其境內稱皇  
帝建年號歸嗣立至隋遷於江陵

次於郊外詔廣平王

楊雄吏部尚書韋康持節以迎衛尉設次於館驛雄等  
降就便幕歸服通天冠絳紗袍端珽立於東階下西面  
文武陪侍如其國雄等立於門右東面歸攝內史令柳  
顧言出門請事康曰奉詔勞於梁帝顧言入告歸出迎  
於館門外西面再拜持節者導雄與歸俱入至於庭下  
歸北面再拜受詔訖雄等乃出立於館門外道右東向  
歸送於門外西面再拜及見帝冠通天冠服絳紗袍御  
大興殿如朝儀歸服遠遊冠朝服以入君臣並拜禮畢

而出○大唐貞觀二十年有司言按史記正月諸侯王朝賀凡四人晉長安不過二十日今請每春二王入朝禮畢還藩從之至二十二年十月令百僚朔望服袴褶以朝開元二十五年十一月御史大夫李適之奏每至冬正及緣大禮應朝參官并六品清官並服朱衣餘六品以下官許通着袴褶如有慘故准式不合着朱衣袴褶者其日聽不入朝自餘應合着而不着者請奪一月俸以懲不恪制曰可天寶三載二月勅百官朔望朝參

應服袴褶并着珂傘至閏二月初一日宜停自今以後  
每逢此閏仍永為恒式六載九月勅自今以後每朔望  
朝晚於常儀一刻進外辦每坐喚伏令朝官從容至閤  
門入至障外不須趨走百司無事至午後放歸無為守  
成宜知朕意十二載十一月御史中丞吉溫奏請京官  
朔望朝參着朱衣袴褶五品以上着珂傘制曰可十四

載三月勅常參官分日入朝尋勝宴樂

貞觀十五年正月太宗謂侍臣

曰古者諸侯入朝有湯沐邑芻禾百車待以客禮漢家  
故事為諸州刺史郡守創立邸舍於京城頃間都督刺

史充考使至京師皆賃房與商人雜居既復禮之不足  
必是人多不便至十七年十月下詔令就京城內間坊  
為諸州朝集使各造邸第三百餘所太宗親觀幸焉至  
永淳元年闕中饑乏諸州邸舍漸漸殘毀至神龍元年  
司農卿趙復溫希權要奏請出賣並盡至建中元年十  
二月勅每州邸舍各令本郡量事依舊營置至二年五  
月戶部奏若令州府自置事又煩費伏請以官  
宅二十所分配共給諸州朝集使勅旨宜依

其受蕃

### 國朝聘如開元禮

天子受諸侯遣使來聘

秦漢以降並無其禮今所編纂者但欲知三代禮儀

耳

周制諸侯遣使聘天子皆以卿為使大夫為上介士為

衆介

公介七人伯五人子男二人諸侯之臣使各下其君二等

將行之朝朝服釋幣

於禰告為君然後釋幣於行

在廟門之外也

介及衆介皆從遂

受命於朝受聘珪享束帛加璧

二王之後公使則享用珪也次受夫人之聘使

則享用玄纁束帛加璧

遂行至天子畿更張壇

示有事於此

先謁關人

關人報王使請事遂導以入

若公之孤則三積一問一勞至郊迎張壇而入

王

使大夫授館遣人致殮將行聘之前皆遣人授舍於文

王廟門外行聘之朝釋幣於禰服冕服乘車建壇至大

門外下車王服皮弁服受聘

時賓亦服皮弁服

受訖王更服服

衮冕入廟當扆而立賓入次改服裨冕而入士介皆隨  
賓後入行享於廟亦升堂進玉王前撫之亦行三享王  
禮之出廟門更行私覲之見王出至大門內使問其君  
及勞聘賓還館主人致饗餼明日發幣於公卿然後受  
享受燕而還王亦使送出境

其餼送之儀與諸  
侯相聘還之禮同

天子遣使來迎勞諸侯

周制諸侯入朝王使小行人迎勞於畿及郊大行人勞  
視館將幣為丞而儼

視館致館也王使勞於郊致館於  
賓賓至將幣使宗伯為上儼郊謂

遠郊去王城五十里

皮弁用璧侯氏亦皮弁迎於帷門外再拜

舍郊

狹寡為帷宮以受勞

使者不答拜遂執玉

即璧也

三揖至於階使者

不讓先升侯氏升聽命降再拜稽首遂升受玉

不答拜者為人

使不當其禮也不讓先升奉王命尊也升者升壇也使東面致命侯氏東階上西面聽命

使者左

還而立侯氏還璧使者受侯氏降再拜稽首使者乃出

左還還南面示將去也立者見侯氏將有事於已侯氏還璧重王禮也

侯氏用束帛乘馬

偃使者再拜受侯氏再拜送幣

偃使者所以致尊敬也拜者各於其階也

使

者降以左驂馬出侯氏送於門外再拜侯氏遂從之

駢馬

曰驂馬設在西也其餘三馬侯氏之士遂出以授使者於門外從之者遂從使者以至朝也諸侯初

至天子賜舍

以其新至道路勞苦未受其禮且使即安

曰伯父汝順命於王

所賜伯父舍

此使者致館辭

侯氏再拜稽首

受館也

傭之束帛乘

馬

王使人以命致館無禮猶傭之者尊王命也

又使大夫戒曰某日伯父帥

乃初事

大夫者卿為訝者也戒告也副相其事使慎修其事初猶故也

侯氏再拜稽首

受覲日也

掌客致禮上公五積飧五牢牽五牢朝訖則致饗

饌九牢

饗饌致相見之大禮熟曰饗生曰饌

侯伯四積飧四牢牽四牢饗

饌七牢子男三積飧三牢牽三牢饗饌五牢殷膳皆太

牢以及歸上公三食三饗三燕侯伯再食再饗再燕子  
男一食一饗一燕若弗酌則以幣致之凡介行人宰史  
皆有殮饗餼以其爵等為牢禮之陳數唯上介有禽獻

殷中也中又致膳示念賓客若不酌獻君有故不親享  
食燕則以酌幣侑幣致之凡介行人宰史衆臣從賓者  
行人主禮牢主具史主書皆有殮饗餼尊其君及其臣  
以其爵等為牢禮之陳數卿則殮二牢饗餼五牢大夫  
則殮太牢饗餼三牢士則殮以少牢饗餼太牢此降小  
禮豐大禮也以命數則參差難等畧於臣用爵而已

凡禮賓客國新凶荒札喪禍災在野皆殺禮

皆為國省用愛費也

國新新建國也禍災謂有  
兵寇水火之事殺色介反

○說曰古者封土建侯並為

列國是以周制朝宗聘覲之禮協天下之事以結諸侯

之好而非朝之歲久無事焉則聘大行人職曰時聘以

結諸侯之好殷覲以除邦國之慝

時聘者無常期天子有事諸侯使大夫來

聘親以禮覲之禮而遣之所以結其恩好也天子無事則已殷覲所謂一服朝之歲也慝惡也一服朝之歲五服諸侯皆使卿以聘禮來見天子天子以禮見之命以政禁之事可以除其惡行覲他弔反

間問以

諭諸侯之志歸賑以交諸侯之福賀慶以贊諸侯之喜

致禮以補諸侯之裁

此四者王使臣於諸侯之禮間問者間歲一問諸侯謂存省之屬也

諭諸侯之志者諭言語諭書名其類也交或往或來者贊助也致禮凶禮之弔禮禮補諸侯之裁也

若諸

侯相聘之制則比年小聘三年大聘相勵以禮則外不相侵內不相陵此天子所以養諸侯兵不用而諸侯自為正之具也以珪璋聘重禮也已聘而還珪璋此輕財重禮之義也諸侯相勵以輕財重禮則民作讓矣

三恪二王後

虞

隋

夏

周

魏

晉

東

宋

宋

虞舜以堯子丹朱為賓曰虞賓而不臣之

虞書云虞賓在位羣后德

讓

○夏禹封丹朱於唐舜子商均於虞皆有疆土以奉

先祀服其服禮樂如之以客禮不臣也○周武王克商

而封夏後於杞殷後於宋皆爵公封舜後於陳爵侯以

脩三恪

周得天下封夏殷二王後又封舜後謂之三恪恪敬也義取王之所敬也并二王後為三國其

後轉降示敬而

已故曰三恪

司几筵延國賓於牖前左彤几

國賓王公之所

不臣者馬融以為二王後

王者立三恪二王之後者欲通師法之義

其前代之後使之郊天以天子禮祭其始祖受命之王

自行正朔服色此得通三正也

三正者天地人也三正之道由三微之月受命

之正各法其一尚書大傳云夏以孟春為正殷以季冬為正周以仲冬為正必用此三微之月為正者時物尚

微以明王者受命扶微奉成此正使其道重大正始也

○魏文帝封後漢帝協為

山陽縣公邑萬戶位在諸侯王上奏事不稱臣受詔不拜以天子車服郊祭天地宗廟祖臘如漢制都山陽濁鹿城青龍二年薨謚曰孝獻皇帝以漢天子禮儀葬於

禪陵○晉武帝太始元年十二月遣太僕劉源告太廟

卦魏帝

常道鄉公

魚為陳留王詔曰明德昭融遠鑒天命欽

象歷數用禪厥位敢咨詢故訓以敬授青土於東國永為晉賓載天子旌旗乘五時副車行魏正朔郊祀天地禮樂制度皆如魏舊以承王顯祖之禋祀又詔王上書

不稱臣答報不為詔一如賓禮二年詔陳留王操尚謙  
冲每事輒表非所以優崇之也主者諭意非大事皆使  
王官表上之三年太常上言博士祭酒劉喜等議漢魏  
為二王後夏殷周之後為三恪衛公署於前代為二王  
後於大晉在三恪之數應降稱侯祭祀制度宜與五等  
公侯同有司奏陳留王山陽公為二代之後衛公脩三  
恪之禮易稱有不速之客三人來此則以三為斷不及  
五代也○東晉明帝太寧二年詔曰三恪二王代之所

重興滅繼絕政之所先禋祀不傳甚用傷悼主者詳議  
立後以聞時曹勵為嗣陳留王以主魏祀升平元年陳  
留王勵表稱廢疾積年不可以奉祭祀請依春秋之義  
求以立後太學博士曹耽議春秋之義立子以貴不以  
長蓋以為宗廟主故也晉公族穆子有廢疾以讓其弟  
衛襄公嗣子繫足不能行立其弟晉衛皆廢嫡立庶者  
明臣之義終無執祭朝見之期以之居位違犯情禮故  
也禮有故使人攝祭非終身疾者勵為君王故事未有

諸侯以疾去國成比胡訥議孟絜立弟異於陳留二王之後禮不宜廢太常王彪之奏臣按訥耽二議為許其所陳也各無明文臣以為經史所記未有南面稱孤而以病疾退為庶人者也勵纂封先代近四十年位在朝賓今以疾退既廢之後若同庶人則名賤而役廝處以朝官則職替而班下以舊禮則制重而無位量茲三義莫知其禮宗廟享祭禮有假攝古今依禮行之有由來矣孝武帝太元十二年博士庾弘之等議陳留王前代

之後遇以上賓之禮皇太子雖國之儲副在人臣之位  
今謂班次宜在王下又按僕射王彪之以為禪讓之始  
王與繼嗣之末孫降殺殊矣是以春秋之會杞不異列  
宋不殊位今陳留王朝會自任其來則無繩墨之准既  
以來朝則應有常次至於大會升殿雖無上位然無殊  
別之座名同朝錄將事有例且朝錄蓋是紀官名之簡  
制曰可

時陳留嗣王薨王彪之議山陽公薨故事給絹二百疋山陽於今稍遠今可特給絹布二百疋

錢三十萬宜少優於山陽

○宋武帝永初元年封晉恭帝為零陵王

居於秣陵行晉正朔車旗服色一如其舊有文而不脩其禮文帝元嘉五年散騎常侍荀伯子上疏曰伏見百官位次陳留王在零陵王上按春秋次序諸侯宋居杞陳之上臣以零陵王位宜在陳留王上陳留王宜降爵為公十一年皇太子出會升在三恪○隋封後周靖帝為介國公○大唐武德元年五月詔曰革命創制禮樂變於三正修廢繼絕德澤崇於二代其以莒之鄆邑奉隋帝為鄆公行隋正朔車騎服色一依舊章貞觀二年

八月制曰二王之後禮教宜崇寢廟不修廩餼多闕非所以追崇先代式敬國賓可令所司量置國官營立廟宇永昌元年十一月制以周漢之後為二王仍封舜禹成湯之裔為三恪神龍元年五月制宜依舊以周隋為二王後天寶八載七月封後魏孝文十代孫元伯明為韓國公以脩三恪九載處士崔昌上封事推五行之運以國家合承周漢其後周隋不合為二王後請廢下公卿議集賢學士衛包因抗表陳其議論夜四星聚於尾

宿天意昭然遂從之乃求殷周漢後為三恪二王後廢  
韓介鄒等公至十二載五月楊國忠奏周漢寢遠不當  
為二王後復以後魏後周隋依舊為三恪二王後其本  
封韓介鄒等公如故○議曰三恪二王之義有三說焉  
一云二王之前更立三代之後為三恪此據樂記武王  
克商未及下車封黃帝堯舜之後及下車封夏殷之後  
通已用六代之樂二云三王之前但立一代通二王為  
三恪此據左傳但云封胡公以備三恪明王者所敬先

王有二更封一代以備三恪存三恪者所敬之道不過於三以通三正三云二王之後為一恪妻之父母為二

恪夷狄之君為三恪此據王有不臣者三而言之

不臣二王

後者尊敬先王通三正之義故書有虞賓在位詩云有客有客亦白其馬明天下非一家所有敬讓之至故封建之使得服其正色用其禮樂以事先祖故孔子云夏禮吾能言之杞不足徵也殷禮吾能言之宋不足徵也不臣妻父母者妻之言齊也與已齊體共承先祖故尊其父母春秋左傳云紀季姜歸於京師稱字者子尊不加父母妻與已齊體故夫不得臣之四夷之君不臣者尚書大傳曰越裳氏獻白雉周公辭不受曰正朔不施則君子不臣也按梁崔靈恩云三義之說以初為長何者禮記

郊特牲云存二王之後尊賢不過二代又詩云二王之  
後來助祭又春秋公羊傳說曰存二王之後所以通三  
正以上皆無謂二王之後為三恪之文若更立一代通  
備三恪者則非不過二代之意左傳云封胡公以備三  
恪者謂上同黃帝堯舜下同殷夏為三恪也又按二王  
三恪經無正文崔靈恩據禮記陳武王之封遂以為通  
存五代竊恐未安今據二代之後即謂之二王三代之  
後即謂之三恪且武王所封蓋以堯有則天之大人莫

能名黃帝列聚星辰正名百物自以功齊萬代師範百  
王故特封其後偶契二三之數實非歷代通法故記云  
尊賢不過二代示敬必由舊因取通已為三正也其二  
代之前第三代者雖遠難師法豈得不錄其後故亦存  
之示敬其道而已因謂之三恪故左傳云封胡公以備  
三恪是知無五代也况歷代至今皆以三代為三恪焉

通典卷七十四

欽定四庫全書

通典卷七十五

唐 京 兆 杜 佑 卿 撰

禮三十五 賓二

天子朝位 諸侯附○周 大唐

周制天子有四朝

但言三朝者以詢事之朝非常朝故不言之

一曰外朝

在

門內決罪聽訟之朝也

秋官朝士掌之左九棘孤卿大夫位焉羣

士在其後右九棘公侯伯子男位焉羣吏在其後面三

槐三公位焉州長衆庶在其後左嘉石平罷人焉右肺

石達窮人焉

斯聽獄之時所列位也樹棘以為位者取其赤心而外刺象以赤心三刺也槐之言

懷也懷來人於此欲與之謀也嘉石文石也平成也成人之善也肺石赤石也罷人不容作勞有似於疲謂惰慢人窮人謂天人之窮無告者羣吏府史州長鄉遂之官也王之五門雉門為中門雉門設兩觀與宮門同閭人譏出入者窮人蓋不得入罷音疲二曰中朝在路門外夏官司士正其位辨

其貴賤之等朝夕視政公卿大夫辨色而入應門北面

而立東上王揖孤卿以上特揖大夫旅揖士旁三揖各

就位

特揖一一揖之也旅衆也大夫同爵者衆揖之公卿大夫王揖之乃就位羣士及故士太僕之屬登

在其位羣士東面王西南向  
揖之三揖者士有上中下

王南向三公北面東上孤

東面北上卿大夫西面北上王族故士武士在路門之

右南面東上太僕太右太僕從者在路門之左南面西

上

此王日視朝事於路門外之位王族故士故為士免  
退留宿衛者未嘗為士雖同族不得在王宮太右司

右也太僕從者小臣  
祭僕御僕隸僕也

三曰內朝亦謂路寢之朝人君既

從正朝視事畢退適路寢聽政使人視大夫大夫退然

後適燕寢釋服

釋服服  
玄端也

四曰詢事之朝

在雉  
門外

小司寇掌

其政以致萬人而詢焉一曰詢國危二曰詢國遷三曰

詢立君

國危謂有兵寇國遷謂徙都立君謂君無冢嫡選於庶子聚萬人而詢謀焉

其位王

南向三公及州長百姓北面羣臣西面羣吏東面羣臣

羣臣卿大

夫士也羣吏府史也其孤不見者孤從羣臣卿大夫在公後

小司寇儉以序進而問

焉以衆輔志而弊謀

儉謂揖之使前序更也輔志尊王賢明也弊斷也

其時會

殷同方岳之下為壇見諸侯之法如明堂之位天子壇

上南面三公中階之前北面東上諸侯阼階之東西面

北上諸伯西階之西東面北上諸子門東北面西上諸

男門西北面東上六服之外九夷之國東門之外西面

北上八蠻之國南門之外北面東上六戎之國西門之  
外東面南上五狄之國北門之外南面東上九采之國  
應門之外北面東上四塞代一見其位亦近主位為尊  
也諸侯三朝路寢為內朝中朝在路門外外朝在應門  
外諸侯社稷與中朝正相當故傳云間於兩社為公室  
輔者也○說曰天子路寢門有五焉其最外曰臯門二  
曰庫門三曰雉門四曰應門五曰路門路門之內則路  
寢也臯門之內曰外朝朝有三槐左右九棘近庫門有

三府九寺庫門之內有宗廟社稷雉門之外有兩觀連門觀外有詢事之朝在宗廟社稷之間雉門內有百官宿衛之廨應門內曰中朝中朝東有九卿之室則九卿理事之處考工記曰有九室九卿理之朝則入而理事夕則歸於庫門外外朝之法朝有疑獄王集而聽之故禮云王會三公會其朝者諸侯未去亦於此也廣問之義詢於芻蕘之謀三刺問以定其法燕朝者路寢之朝羣公以下常日於此朝見君位其位太僕掌之初入之

時亦門右北面東上王揖之三公則階前北面東上孤  
東面卿大夫西面皆北上士則外門之西北面東上凡  
射先用燕禮其位亦然所以每朝列位所向不同者皆  
以事異故變其位三公之位常北面不變者以三公內  
臣位尊故屈之使常北面其餘諸侯孤卿大夫皆以地  
道尊右故尊者東面卑者西面是以於外朝之時諸侯  
東面尊於孤卿也故於內朝孤卿東面尊於卿大夫也  
時亦無諸侯故也唯詢事之朝非常朝之限故不與三

朝同或云客有諸侯之位故旅卿在東也○大唐開元六年八月勅九族既睦百官有序至於班列宜當分位嗣王實先於主祭國老有貴於乞言比在朝儀尚為間雜非所謂睦親敦舊之義也嗣王宜與開府儀同三司等致仕官各居本品之上用為永式廣德二年九月勅朝參官遇泥雨准儀制令例停朝參今軍國事殷若准式停恐有廢闕泥既深阻許延三刻傳點待道路通依常式以後亦宜准此貞元二年八月御史中丞竇參奏

准儀制令泥雨合停朝伏以軍國事殷恐有廢闕請令

每司長官一人入朝有兩員并副貳亦許分日其夜甚

雨至明不止許令伏下後到九月勅一應文武百官朝

謁班序中書門下

侍中中書令同中書門下平章事各以官為序

供奉官

左右散騎

常侍門下中書侍郎諫議大夫給事中中書舍人起居郎及舍人左右補闕左右拾遺通事舍人在橫班若

入閣即各隨左右省主其御史大夫中丞侍御史

左在殿

中侍御史

右在通事舍人

分立左右

若橫行參賀辭見

御史大夫在散

騎常侍之上中丞在諫議大夫之下

御史臺

御史大夫在三品之上別立中丞在五品官之上別立

留守副元帥都統節度使觀察使都團練都防禦使并大都督大都護持節度者即入班在正官之次餘官兼者各從本官班序

御史在六品之後

諸侯下無本官唯授內供

奉裏行者即入班亦在正官之次有本官兼者各從本

官班序如本官不是常參官并憲官攝者唯聽於御史

班中辭見殿中省官監少監尚衣尚舍尚輦奉御分左

右隨繖扇立若入閣亦如之一品班

三太三公太子三太嗣王郡王散官

開府儀同三司爵國公

二品班

尚書左右僕射太子三少京兆河南牧大都督大都護散官特進光

祿大夫爵開國郡公開國三品班六司尚書太子賓客  
縣公勲官上柱國柱國九寺卿國子祭酒三

監京兆等七府尹詹事親王傳中都督上都護下都督  
下都護上州刺史五大都督府長史上都護府副都護  
散官金紫光祿大夫爵開四品班尚書左右丞六司侍  
國侯勲官上護軍護軍郎太常少卿宗正少

卿左右庶子祕書少監左右七寺少卿國子司業少府  
殿中少監京兆河南太原少尹少詹事左右諭德家令  
率更僕親王府長史司馬鳳翔等少監中州刺史下州  
刺史大都督大都護司馬散官正議大夫通議大夫太  
中大夫中大夫爵開國伯勲五品班尚書諸司郎中  
官上輕車都尉輕車都尉子博士都水使者

萬年等六縣令太常宗正祕書丞著作郎殿中丞尚食  
尚藥尚舍尚輦奉御大理正中允左右贊善中舍人洗  
馬親王諮議友散官中散大夫朝散大夫朝請武班供  
大夫爵開國子開國男勲官上騎都尉騎都尉

奉班宣政殿前立位

從北千牛連行立次千牛中郎將次千牛將軍一人次過狀中郎將

一人次接狀中郎將一人次押柱中郎將一人次押散手伐中郎將柱中郎將一人次排階中郎將一人次押散手伐中郎將

將一人以上在橫階北次南金吾將軍分左右立

入閣升殿

夾階座左右從南千牛將軍一人次

千牛郎將一人次千牛連行立柱外過狀中郎將一人次接狀中郎將一人次押柱中郎將一人次又押柱中

郎將一人排階中郎將一人階下押散手仗中郎將一人金吾將軍分左右立

應當本日入閣

人各依前件立其不合入閣人各依本職事立非當上

人遇合參日並從本官品第班次其入閣升殿除千牛

衛將軍中郎將外餘並以左右衛中郎將充其諸衛及

率府中郎將不得升殿一品班

郡王散官驃騎大將軍爵國公

二品班

散官輔國大將軍鎮國大將軍爵開國郡公開國縣公勳官上柱國柱國

三品班

左右衛左右金吾衛

左右驍衛左右武衛左右威衛左右領軍衛左右監門衛左右千牛衛大將軍諸衛將軍散官冠軍大將軍雲

麾將軍爵開國侯勳官上護軍護軍

四品班

左右千牛衛左右監門衛中郎將親勳翊衛中郎將太子

左右衛司率清道內率監門副率太子親勳翊衛中郎將上府折衝都尉中府折衝都尉散官忠武將軍壯武

將軍宣威將軍明威將軍爵開國伯勳官上輕車都尉輕車都尉

五品班

親勳翊衛郎將太子親勳

翊衛郎將親王府典軍親王府副典軍下府折衝都尉上府果毅都尉散官定遠將軍寧遠將軍遊擊將軍遊

騎將軍爵開國子開國男勳官上騎都尉騎都尉

尚書省官

援周禮先叙六官准六典尚書為百

官之本今每班請以尚書省官為首自周及漢未有中書西漢時中書主文書即今之宦者主文書謂文書家是也時尚書之職猶微至後漢尚書職重方為百官之本所以尚書郎下筆為詔詔出言為策令魏文帝置中書則今中書也其尚書出外則今之尚書是也且周禮六官盡管天下衆務後漢尚書亦然及魏置尚書則中書廢矣尚書乃重設也如制處置中書門下便下百司豈非省便何乃下尚書省尚書方更下詔諸司豈非繁重者乎昔荀勗桓溫已有此議今實參不徵其變更不辨其省恐非通才達學之士

東宮官王府

官外官

東宮官既為宮臣請在上臺官之次王府官又次之三太三少賓客庶子王傅既為師傅賓相

不同官屬請依舊

太常宗正丞

並隨寺望合在祕書丞上

尚食奉御尚藥奉

御本局既隸殿中省合在殿中丞之下

諸王府官

行列合以王長幼為序

檢校官兼

官及攝試知判等官

並列在同位正官之次其有行守  
檢校兼試攝判等官職事者即依

正官班序除留守副元帥都統節度使觀察使都團練  
都防禦使兼大都督大都護持節兼外餘應帶武職事

者位在西班仍各以  
本官品第為班序含元殿前龍尾道下叙班舊無此

於通乾觀象門南叙班自李若水任通事舍人  
奏更於龍尾道下叙班既非典故今請停廢文武官

行立班叙通乾觀象門外叙班武次於文至宣政門文  
由東門而入武由西門而入至閤門亦如之

其退朝並從  
宣政門而出文官充翰林學士皇太子侍讀武官充禁

軍職事

准舊制並不常朝參其翰林學士大朝會日准  
興元元年十二月勅朝服班叙宜准諸司知制

誥例其集賢史館等諸職事  
者並請朝參訖各歸所務辭見宴集班列先後請依  
天寶

二年七月禮部詳定所奏勅

公式令

在諸文武官朝參行立二王後位

為叙職事同者以齒致仕官各居本品之上若職事與散官勲官合班則文散官在當階職事者之下武散官次之勲職又次之官同者異姓為後若以爵為班者爵同者亦准此其男以上任文武官者從文武班若親王嗣王任卑者職事仍依本品郡王在三品以下職事官在同階品上自外無文武官者嗣王在太子太保下郡王次之國公在正三品下郡公在從三品下縣公在正四品下侯在從四品下伯在正五品下子在從五品下男在從五品下即前資官被召及赴朝參致仕在本品見任上以理解解者在同品下其在本司參集者各依職事諸司散官三品以上在京者正冬朝會依儀制令在百官例自餘朝集及湏別使臨時聽勅進止儀制令在京文武官職事九品以上朔望日朝其文武五品以上及監察御史員外郎太常博士每日朝參文武官五品

以上仍每月五日十一日二十一日二十五日參三品  
以上九日十九日二十九日又參當上日不在此例其  
長上折衝果毅若文武散官五品以上直諸司及長上  
者各准職事參其弘文崇文館及國子監學生每季參  
若兩霑失容及泥潦並停諸文武九品以上應朔望朝  
參者十月一日以後二月二十日以前並服袴褶五品  
以上者着珂傘周喪未練大功未  
塋非供奉及諸宿衛官皆聽不赴  
常參文武官准令每

日參自艱難以來人馬劣弱遂許分日伏望且許依前  
分日參待戎事稍平加以俸祿即依恒式其武官准令  
五品以上每月六參三品以上更加三參並頃停廢今  
請准令却復舊儀其朔望朝參及弘文崇文館國子監

學生每季叅等請續商量間奏勅旨二品武班宜以左  
右金吾等十六衛上將軍依次為班首其檢校官兼攝  
試知判等本官二品以上者位望崇重禮異羣僚宜依  
本班朝會餘依四年七月勅自今以後嗣郡王宜列於  
本官班之上其庶子宜在少卿之上

天子上公及諸侯卿大夫士等贊

工商婦人等贊  
附○虞夏

周  
魏

有虞氏舜典云修五禮五玉

五禮吉凶軍賓嘉之禮五  
玉五等諸侯所執之玉

三帛二生一死贄

三帛諸侯太子執纁公之孤執玄附庸之君執黃二生卿執羔大夫執雁

一死士執雉玉帛生死所以為贄也

如五器卒乃復

卒終復還也器謂圭璧如五器禮終即還

之三帛二生一死則否也

○夏后氏左傳云禹會諸侯於塗山執玉

帛者萬國○周制凡贄天子以鬯

鄭氏云天子無客禮以鬯為贄者所以灌

用告神

諸侯執珪孤執皮帛卿執羔大夫執雁士執雉庶

人執鵞工商執雞

皮帛者束帛而表之以皮為飾如虎皮豹皮帛如珪色繒也羔小羊也取

其羣而不失其類雁取其候時而行雉取其守耿介死而不失其節鵞取其不飛遷雞取其守時而動曲禮曰

飾羔雁者以續皆衣之以布而又畫之自雉以下執之無飾士相見禮卿大夫飾贄以布不言畫續此諸侯之

臣與夫天子之臣異者也然則天子之孤飾贄以虎皮公之孤飾贄以豹皮歟此孤卿大夫士之贄皆以爵不以命數凡贄無庭實也

野外軍中無贄以纓拾矢可也

非為禮之處以時物

相禮而已纓馬繫

婦人之贄楨榛脯脩棗栗

婦人無外物也拾謂射韞也

物也根榛棗栗果名根枳根也有實今邳剡之東食之榛似栗而小根俱兩反

○說曰古者人

君及臣重於相見之禮所以相尊敬故將有所見必執

贄贄者至也信也君子於其所尊必執贄以相見明其

厚心之至以表忠信不敢相褻也然天子無客禮亦有

贄者明有事神祇之道故須贄以表心故巡狩至於山

川有所告之用鬯酒盛以大璋中璋又典瑞云王攝大  
珪執鎮珪藻五采五就朝日明其所尊敬象臣之朝君  
也執鎮珪視安四方以表其功也凡公卿大夫執贄者  
皆謂始朝及初相見用之諸侯德厚故執玉以比德卿  
大夫以下德薄故用皮帛羔雁之等射人職云王將射  
之時公卿朝見三公執璧卿執羔天子之三公所以執  
璧為臣之屈與子男同佐王論道理取圓足以璧為贄  
不必飾以蒲穀諸侯賓射之時卿大夫士亦皆執贄見

其君如天子卿大夫之禮君子所以執玉以比德者也  
○魏明帝青龍二年詔下司空征南將軍帶金紫都督  
使位高任重近者正朝乃與卿校同執羔非也自今以  
後從特進應奉璧者如故事博士高堂隆議曰按周禮  
公執桓珪公謂上公九命分陝而理及二王後也今大  
司馬公大將軍實分征東西可謂上公矣山陽公衛國  
公則二王後也侯執信珪謂地方四百里伯執躬珪謂  
地方三百里皆七命也今郡王戶數多者可如侯少者

可如伯子執穀壁謂地方二百里男執蒲壁謂地方百里皆五命也今縣主戶數多者可如子少者可如男上公禮其率諸侯以朝則執桓珪自非朝宗則如八命之公與王論道有事而進則執璧今二王後諸王若入朝覲二公率以進退則執桓珪其朝王則與羣公執璧按周禮王官唯公執璧漢大將軍驃騎車騎衛將軍開府辟召掾屬與公同儀則執璧可也孤皮帛卿羔孤謂天子七命之孤及大國四命之孤副公與王論道尊於六

卿其執贄以虎皮表束帛今九卿之列太常光祿勳衛尉尊於六卿其執贄如孤也其朝王執皮帛可也三府長史亦公之副雖有似於孤實卑於卿中大夫之禮可也公之孤覲聘於天子及見於其君其贄以豹皮表束帛今未有其官意謂山陽公之上卿可以當之卿謂六官六命之卿及諸侯三命再命之卿也今六卿及永壽永安長秋城門五校

左校右校前校後校中校

皆執羔可也諸侯之

卿自於其君亦如之天子卿大夫飾羔雁以繢諸侯卿

大夫飾羔雁以布州牧郡守以功德賜勞秩比中二千石者其入朝覲宜依卿執羔金紫將軍秩比中二千石與卿同大夫執雁謂天子中下大夫四命及諸侯再命一命之大夫也其位卑於卿今王府長史及五命二千石之著者也博士儒官歷代禮服從大夫如前執雁可也州牧郡守未賜者宜依大夫執雁皆飾以繡諸縣千石六百石今古大夫若或會覲宜執雁飾以布士執雉謂天子三命之士及諸侯一命再命之士也府史以下至於比長庶人在官

亦謂之士諸縣四百石三百石長從士禮執雉可也

### 信節

周制地官掌節掌守邦節而辨其用以輔王命

邦節者珍珪牙

璋穀珪琬珪琰珪也有王命則別其節之用以授使者輔王命者執以行為信珍音鎮下同

守邦國

者用玉節守都鄙者用角節

謂諸侯於其國中公卿大夫王子弟於采邑有命者

亦自有節以輔之玉節之制以玉為之以命數為大小角用犀角其制未聞也

凡邦國之使節

山國用虎節土國用人節澤國用龍節皆金也以英蕩

輔之

使節使卿大夫聘於天子諸侯行道所執之信也土平地也山多虎平地多人澤多龍故為節以金

鑄象馬必自以其國所多者於以相別為信明也漢有銅虎符杜子春云英蕩當為帑謂以函器盛此節也或云英蕩

門關用符節貨賄用璽節道路用旌節皆有期

以返節

門關司門司關也貨賄者主通貨賄之官謂司市也道路者主理五途之官謂鄉遂大夫也凡

人遠出至於邦國邦國之人若來入由門者司門為之節由關者司關為之節其商則司市為之節其以徵令及家徙則鄉遂大夫為之節不過閭不用節也變司市言貨賄者璽主通貨賄也變鄉遂言道路者容公邑及小都大都之吏皆主理五途亦有人也符節如漢之宮中諸官詔符也璽節如漢之印章也旌節漢使者所擁節是也將送者執此節以送行者皆以此道里日時課如漢之郵行者有程矣以防姦姦擅有所通也凡節有法式藏於掌節小行人職云道路旌節門關符節都鄙管節皆竹為之鄭注云管節如漢竹使符也都鄙者公

之子弟及卿大夫采地之吏耳

凡通達於天下者必有節以傳輔之

必有節言遠行無有不得節而出者也輔之以傳者節為信通傳說所賈操之所適也

無節者有

幾則不達

內之

琬珪九寸而縹以象德以結好

琬猶圓也王使

之瑞節諸侯有德王命錫之使者執琬珪以致命焉

穀珪七寸以和難以聘女

珪穀

亦王使之瑞節難讐也聘女納徵加於束帛也

瑑珪璋八寸璧琮八寸縹皆二

采一就以覲聘

璋以聘后宗享大夫衆來曰覲寡來曰聘瑑有文飾也

珍珪以徵

守以恤凶荒

珪制當與琬瑑相依王使人以徵諸侯憂凶荒之國授之執以往致王命焉

牙

璋中璋七寸射二寸厚寸以起軍旅以理兵守

二璋皆有鉏牙

之飾於琰側兵守用兵

琰珪以易行以除慝

琰珪亦王使之瑞節

也琰珪有鋒芒傷害征伐誅討易惡行令為善者則以此珪責諭以告也

大璋七寸射四寸

諸侯以聘女

納徵加於束帛也

通典卷七十五

欽定四庫全書

通典卷七十六

唐 京兆杜佑卿撰

禮三十六軍一

天子諸侯將出征類宜造禡并祭所過山川

周梁

北齊 隋 大唐

周制天子將出征類於上帝宜於社造於禰肆師為帝

位

帝謂五德之帝所祭於南郊者類宜造皆祭名孔穎達云天道遠以事類而祭告之也社主殺戮故求便

宜社主陰萬物於此斷殺故曰宜造至也謂至父祖之廟也言禰者辭時先從卑不敢留尊者命也將出者謂巡狩禰於所征之地禰師祭也為兵禱也其禮亡其神蓋蚩尤或云黃帝又云若至所征

之地祭者則以黃帝蚩尤之神故皆得云禰神也若田狩但祭蚩尤而已受命於祖以遷廟

主載於齊車以行告祖以行示不自專故言受命必以遷主行言必有尊也無遷主

以幣帛皮珪告於祖禰遂奉以出載於齊車以行每舍

奠焉而後就舍以脯醢禮神乃敢即安也所告不以出即埋之若有遷主則載遷主而行幣帛

遂理於階間反必告設奠卒斂幣玉歲諸兩階之間乃出蓋

貴命也受成於學定兵謀也過大山川則用事焉用事令太祝用祭事

告之凡出必用牲幣  
反亦如之牲皆為制  
出征執有罪反釋奠於學以訊馘

告

釋菜奠幣禮先師也  
訊馘所生獲斷耳者

諸侯將出征宜社造禰及無遷

主以主命並如天子之制○梁天監初陸璣定軍禮依

古制類造等用牲幣帝曰宜者謂征討得宜造者稟謀

於廟類者奉天時以明伐並明不敢自專陳幣承命可

也璣不能對嚴植之又爭之於是告用牲幣反亦如之

○北齊天子親征纂嚴則服通天冠文物充庭有司表

更衣乃入冠武弁左貂附蟬以出誓訖其日脩法駕乘

木輅以造於廟載遷廟主於齊車以俟行次宜於社有司以毛血饗軍鼓載帝社祏主於車以俟行次擇日陳六軍脩大駕類於上帝次擇日祈后土神州岳鎮海瀆川源等乃為坎盟督將列牲於坎南北首有司於坎前讀盟文割牲耳承血皇帝受牲耳徧授大將乃寘於坎又歃徧又以寘坎禮畢埋牲及盟書又曰建牙旗於壇祭以太牢及所過名山大川有司致祭將屆戰所卜剛日備玄牲列軍容設於辰地為壇而禡祭大司馬奠矢

有司奠毛血樂奏大濩之音禮畢徹牲柴燎戰前一日  
皇帝禱祖司空禱社戰勝則各報以太牢又用太牢賞  
用命於祖引功臣入旌門即神庭而授版焉又罰不用  
命於社即神庭行戮訖振旅而還格廟詣社訖擇日行  
飲至之禮文物充庭有司執簡記年號月朔陳六師凱  
入格廟之事飲至策勲之美用述其功不替賞典焉○  
隋制天子行幸有司祭所過名山大川岳瀆以太牢山  
川以少牢若親征及巡狩則類上帝宜造社廟還禮亦

如之大業七年征高麗煬帝遣諸將於薊城南幸乾河  
上築社稷二壇設方壇行宜社稷帝齋於臨朔宮懷荒  
殿與告官及侍從各齋於其所十二衛兵士並齋帝服  
衮冕玉輅脩法駕禮畢御金輅服通天冠還宮又於宮  
南類上帝積柴燎壇設高祖位於東方帝服大裘而冕  
乘玉輅祭奠玉帛並如宜社諸軍受胙畢帝就位觀燎  
乃出將發帝御臨朔宮親授節度遂出

其大駕具  
出師儀篇

是歲

行幸觀海鎮於禿黎山為壇祠黃帝行禡祭皇帝及諸

陪祭近侍官諸軍將皆齋一宿有司供帳設位為埋坎  
神座西北內壝之外建二旗於南門外以熊席設帝軒  
轅神座皇帝出次入門羣官定位皆再拜奠禮畢還行  
宮○大唐制車駕行幸及親征有司類宜造禡如開元  
禮

輶祭 周 後周 隋 大唐

周制天子將出師大馭掌馭玉輅以祀及犯輶王自左  
馭馭下祝登受轡犯輶遂驅之

行山曰輶犯之者封土  
為山象以菩芻棘柏為

神主既祭之以車轆之而去喻無險難也春秋傳曰跋涉山川自由也王由左馭禁制馬使不行也轆音蒲末

反音負及祭酌僕僕左執轡右祭兩軹祭軹乃飲

軹謂兩軹軹謂

車軹前也軹音衛軹音範

○後周迎太白出國門而轆祭○隋制皇

帝行幸親巡狩則轆祭其禮有司於國門外委土為山象設埋埴有司剗羊陳俎豆駕將至委奠幣薦脯加羊饌埋於埴駕至太僕祭兩軹及軹乃飲授爵遂轆轆上而行○大唐車駕親征如開元禮

天子諸侯四時田獵

周

宋

梁

陳

北齊

後周

隋

大唐

周制天子諸侯無事則歲行蒐苗獮狩之禮仲春教振

旅司馬以旗致民平列陣如戰之陣

以旗者立旗期民於其下也兵者凶

事不可空設因蒐狩而習之凡師出曰治兵入曰振旅皆習戰也四時各教民以其一焉春習振旅兵入收衆專於農平猶正也王執路鼓諸侯執鼗鼓軍將執晉鼓師帥執

提旅帥執鼗卒長執鐃兩司馬執鐸公司馬執鐃

鼓人職曰

以路鼓鼓鬼享以鼗鼓鼓軍事以晉鼓鼓金奏以金鐃止鼓以金鐸通鼓以金鐃節鼓提謂馬上鼓有曲木提持立馬髦上者故謂之提杜子春云公司馬謂五人為伍之司馬也鄭玄謂王不執鼗鼓尚之於諸侯也伍長謂之公司馬者雖卑亦同其號鼗音墳以教坐作進退疾徐疏數之節

戰習

法遂以蒐田有司表貉誓民鼓遂圍禁火槩獻禽以祭

社

春田為蒐有司大司徒也掌大田役治徒庶之政令表貉立表而貉祭也誓民誓以犯田法之罰也誓曰

無干車無自後射立旌遂圍禁火槩火止也春田主用火因焚萊除陳草皆殺而火止獻猶致也田止虞人植旌衆皆獻其所獲禽焉詩云言私其縱獻殽于公春田主祭社者土方施生也貉讀為禡

仲夏教茷

舍如振旅之陣羣吏撰車從讀書契辨號名之用帥以

門名縣鄙各以其名家以號名鄉以州名野以邑名百

官各象其事以辨軍之夜事其他皆如振旅

茷舍草止之也軍有

草止之法讀書契以簿書校錄軍實之凡要號名者微識所以相別也鄉遂之屬謂之名家之屬謂之號百官

之屬謂之事在國以表朝位在軍又象其制而為之以備死事夜事戒夜守之事遂以苗田如

蒐之法車弊獻禽以享祔

夏田為苗擇取不孕任者若治苗去不秀實者云車弊驅

獸之車止也夏田主用車示所取物希皆殺而車止祔宗廟之夏祭也冬夏田主於祭宗廟者陰陽始起象神

之在

仲秋教治兵如振旅之陣王載太常諸侯載旂軍

吏載旗師都載旛鄉遂載物郊野載旐百官載旗各書

其事與其號焉其他皆如振旅

軍吏諸軍帥也師都遂大夫也鄉遂鄉大夫也

其載旛或載物衆屬軍吏無所將也郊謂鄉遂之州長縣正以下也野謂公邑大夫載旐者以其將義卒也百官卿大夫也載旗者以其屬衛王也凡旌旗有軍衆皆畫異物無者帛而已書當為畫皆畫以雲氣遂以

獮田如蒐田之法羅弊致禽以祀祊

秋田為獮獮殺也羅弊網止也秋田

主用網中殺者多也皆殺而網止祊當為方秋田主祭四方報成萬物詩云以社以方

仲冬教大

閱

春辨鼓鐸夏辨號名秋辨旗物至冬月簡軍實

虞人萊所田之野為表百步

則一為三表又五十步為一表田之日司馬建旗於後

表之中羣吏以旗物鼓鐸鐃各帥其民而致質明弊

旗誅後至者乃陳車徒如戰之陣皆坐

虞人萊所田之野芟除其草萊

為可陣之處後表之中五十步表之中央表所以識正行列也四表積三百五十步左右之廣當容三軍步數

未聞致致之司馬質正也弊仆也皆坐當聽誓

羣吏聽誓於陣前斬牲以左右

徇陣曰不用命者斬之

羣吏諸軍帥也陣前南面嚮表也月令季秋天子教於田獵以

習五戎司徒搢扑北面以誓之此大閱禮實正歲之仲冬而說李秋之政於周為仲冬為月令者失之矣斬牲者小子也凡誓之大畧

中軍以鞀令鼓鼓人皆三鼓司

甘誓湯誓之屬是也

馬振鐸羣吏作旗車徒皆作鼓行鳴鐻車徒皆行及表

乃止三鼓攬鐸羣吏檠旗車徒皆坐

中軍中軍之將也天子六軍三三而

居一偏羣吏既聽誓各復其部曲中軍之將令鼓鼓以作其士衆之氣鼓人者中軍之將師帥旅帥也司馬振鐸以作衆作起也既起鼓人擊鼓以行之伍長鳴鐻以節之伍長一曰公司馬及表自後表前至第二表也三鼓者鼓人也攬讀如涿鹿之鹿掩上振之為攬攬者止行息氣也司馬法曰鼓聲不過闔鞀聲不過闔鐸聲不

過琅闇音吐剛  
反闔音土答反

又三鼓振鐸作旗車徒皆作鼓進鳴鐸

車驟徒趨及表乃止坐作如初

趨者赴敵尚疾之漸春秋傳曰先人有奪人之

心及表自第二前至第三

乃鼓車馳徒走及表乃止

及表自第三前至前表

鼓

戒三闕車三發徒三刺

鼓戒戒攻敵也鼓一闕車一轉徒一刺三而止象服敵

乃

鼓退鳴鐸且卻及表乃止坐作如初

鐸所以止鼓也軍退卒長鳴以和

衆鼓人止之退自前表至後表鼓鐸則同習戰之禮出入一也異者廢鐸而鳴鐸

遂以狩田以

旌為左右和之門羣吏各帥其車徒以叙和出左右陳

車徒有司平之旗居卒間以分地前後有屯百步有司

巡其前後險野人為主易野車為主

冬田為狩言守取之無所擇也軍門

曰和今謂之壘門立兩旌以為之叙和出用次第出和門也左右或出而左或出而右有司平之鄉師居門正其出入之行列也旗軍吏所載也分地調其部曲疏數前後有屯百步軍徒異羣相去之數也車徒畢出於和門鄉師又巡其行陣鄭司農云險野人為主人居前易野居為主車居前既陣乃設驅逆之車有司表貉於陣前

驅驅出禽獸使趨田者也逆者逆要不得令走設此車者田僕也

中軍以鞀令鼓鼓人皆三鼓羣司馬振鐸車徒皆作遂

鼓行徒銜枚而進

羣司馬兩司馬也枚狀如箸銜之有繮結項中軍法止語為相疑惑也

天子殺則下大綏諸侯殺則下小綏

綏有虞氏之旗也下謂弊也

大

夫殺則止佐車止則百姓田獵

佐車驅逆之車

大獸公之小禽

私之獲者取左耳

鄭玄云大獸公之輸之於公小禽私之以自畀也獲得禽獸者取其左耳

當以計功多少

及所弊鼓皆駢車徒皆譟

及所弊至所弊之處田所當於止也天子

諸侯蒐狩有常至其常處吏士鼓譟象攻敵剋勝而喜也疾雷繫鼓曰駢譟驪也書曰前師乃鼓鼓譟亦謂喜

也駢音駢鼓音符

徒乃弊命致禽饁獸於郊入獻禽以享蒸

徒乃

弊徒止也冬田主用衆物多衆得取也致禽饁獸於郊聚所獲禽因以祭四方之神於郊月令季秋天子既田

命主祠祭禽於四方是也入又以禽祭宗廟

○說曰天生五材人並用之廢

一不可誰能去兵歷代以來禍亂之作非武不定是以

君子習之孔子曰以不教民戰是謂棄之王制曰天子諸侯無事而不田曰不敬田不以禮曰暴天物左氏傳曰春蒐夏苗秋獮冬狩皆於農隙以講武事三年治兵入而振旅歸而飲至以數軍實昭文章明貴賤辨等列順少長習威儀也穀梁傳曰因蒐狩以習用武事禮之大者也艾蘭以為防蘭者草也防為田之大限置旗以為轅門旗旗名通帛為旗轅門以葛覆質以為檠質檠也檠門中梟也葛或為褐檠五昂車以其轅表門結反流旁握御輦者不得入流旁握謂車兩轆頭各去門

得入

車軌塵

塵不出轍

馬候蹄

發足相應遲疾相投

掩禽旅

掩取衆禽

御者

不失其馳然後射者能中

不失馳騁之節

過防弗逐不從奔之

道也

戰不逐奔之義

面傷不獻

嫌誅降

不成禽不獻

惡虐幼小

禽雖多

天子取三十焉一為乾豆

謂自左臑而射達於右臑為上等臑膊前骨也音虞又五

口二為賓客

謂射右耳本為次等

三為充君之庖

謂射左脾達於右肱為下等

其餘與士衆以習射於射宮

取三十以供乾豆賓客君之庖射宮澤宮

射而

中田不得禽則得禽射而不中田得禽則不得禽是以

知古之貴仁義而賤勇力也

射以不爭為仁揖讓為義

○宋文帝元

嘉二十五年閏二月大蒐於宣武塲主司列奏申攝尅  
日校獵百官備設行宮殿便座於武帳幕府山南岡王  
公百官便座幔省如常儀設南北左右四行旌門建旗  
以表獲車殿中郎一人典獲車主者二人收禽吏二十  
四人配獲車十二兩校獵之官著袴褶有帶二品以上  
權乃備鞞麾幡三品以下帶刀皆騎乘將領部曲先獵  
一日布圍領軍將軍一人督右甄護軍將軍一人督左  
甄大司馬一人居中董正諸將悉受節度殿中郎率獲

車部曲在大司馬之後尚書僕射以下諸官曹令史等  
至日會於宣武場列為重圍設留守填街位於雲龍門  
外內官道北外官道南以西為上設從官位於雲龍門  
內大官階北小官階南以西為上設先置官位於行上  
車門外內官道西外官道東以北為上設先置官還位  
於廣莫門外道之東西以南為上校獵日平旦正直侍  
中奏嚴上水一刻槌一鼓為一嚴上水二刻奏槌二鼓  
為再嚴殿中侍御史奏開東中華雲龍門引仗為小駕

鹵簿百官非校獵之官著朱服集列廣莫門外留守填  
街後部從官就位前部從官依鹵簿先置官先行上水  
三刻奏植三鼓為三嚴上水四刻奏外辦正次直侍中  
散騎常侍給事黃門侍郎散騎侍郎軍校劍履進夾上  
閣正直侍中負璽通事令史帶龜印中書之印上水五  
刻皇帝出著黑介幘單衣乘輦正直侍中負璽陪乘不  
帶劍殿中侍御史督攝黃麾以內次直侍中次直黃門  
侍郎護駕在前又次直侍中佩信璽行璽與正直黃門

侍郎從護駕在後不鳴鼓角不得誼譁以次引出警蹕如常儀車駕出譖陞者再拜皇太子入守車駕將至威儀唱引先置前部從官就位再拜車駕至行殿前迴輦正直侍中跪奏降輦次直侍中稱制曰可正直侍中俛伏起皇帝降輦登御座侍臣升殿直衛鉞所立反戟武賁毛頭文衣鷖尾以次列階正直侍中奏解嚴先置從駕百官還便座幔省皇帝若親射禽變服戎服如校獵儀內外從官及武賁悉變服鉞戟抽鞘以備武衛黃麾內

官從入圍裏列置部曲廣張甄圍旗鼓相見銜枚而進  
甄周圍會督甄令史奔騎號法施令曰春禽懷孕蒐而  
不射鳥獸之肉不登於俎不射皮革齒牙骨角毛羽不  
登於器不射甄會大司馬鳴鼓躡圍衆軍鼓譟警角至  
宣武場止大司馬屯北旌門二甄帥屯左右旌門殿中  
中郎率獲車部曲入次北旌門內之右皇帝從南旌門  
入射禽謁者以獲車收載還陳於獲旗之北王公以下  
以次射禽各送詣獲旗下付禽主者事畢大司馬鳴鼓

鮮圍復屯殿中郎率其屬收禽以實獲車奉車奉充庖  
厨正厨置罇酒俎肉於中達以犒饗校獵衆軍至晡正  
直侍中量宜奏嚴從官還著朱服鉞戟復鞘再嚴先置  
官先還三嚴後二刻正直侍中奏外辦皇帝着黑介幘  
單衣正次直侍中散騎常侍給事黃門侍郎軍校進夾  
御座正直侍中跪奏還宮次直侍中稱制曰可正直侍  
中俛伏起乘輿登輦還衛從如常儀大司馬鳴鼓散屯  
以次就舍車駕將至威儀唱引留守填街先置前部從

官就位再拜車駕至殿前迴輦正直侍中跪奏降輦次  
直侍中稱制曰可正直侍中俛伏起乘輿降入正次直  
侍中散騎常侍等從至閣正直侍中奏解嚴內外百官  
拜表問訊訖罷○梁陳並依宋儀其異者置行殿於幕  
府山南岡并設王公百官幕先獵一日遣馬騎布圍領  
軍督左右軍將軍督右大司馬董正諸軍獵日侍中三  
奏一奏植一鼓為一嚴三嚴訖引仗為小駕鹵簿皇帝  
乘馬戎服從者志絳紗幘黃麾警蹕鼓吹如常儀獵訖

宴會享勞比較多少戮一人以懲亂法會畢還宮○北  
齊春蒐禮有司規大防建獲旗以表獲車前一日命布  
圍領軍將軍一人督左甄護軍將軍一人督右甄大司  
馬一人居中節制諸軍天子陳小駕服通天冠乘木輅  
詣行宮將親禽服鉞戟者皆嚴武衛張甄圍旗鼓相見  
銜枚而進常開一方以令三驅圍合吏奔騎令曰鳥獸  
之肉不登於俎者不射皮革齒牙骨角毛羽不登於器  
者不射甄合大司馬鳴鼓促圍衆軍鼓譟鳴角至期處

而止大司馬屯北旌門二甄帥屯左右旌門天子乘馬  
從南旌門入親射禽謁者以獲車收禽載還陳於獲旗  
之北王公以下以次射禽皆送於下事畢大司馬鳴鼓  
解圍復屯殿中郎率其屬收禽以實獲車天子還行宮  
命有司每會擇取三十一曰乾豆二曰賓客三曰充君  
之庖其餘即於圍下量犒將士禮畢改服鉞者韜刃而  
還夏苗秋獮禮皆同○後周仲春教振旅大司馬建大  
麾於萊田之所鄉稍之官以旗物鼓鐸鉦鈇各帥其人

而致誅其後至者建麾於後表之軍中以集衆庶質明  
偃麾誅其不及者乃陳徒騎如戰之陣大司馬北面誓  
之軍中皆聽鼓角以為進止之節田之日於萊之北建  
旗為和門諸將帥徒騎序入其門有司居門以平其人  
既入而分其地險野則徒前而騎後易野則騎前而徒  
後既陣皆坐乃設驅逆騎有司表襦於前以太牢祭黃  
帝軒轅氏於狩地為壇建二旗列五兵於座側行三獻  
禮遂蒐田致禽以祭社仲夏教芟舍遂苗田仲秋練兵

獮田仲冬大閱遂狩其致禽享禘教習之儀並如古周  
法○隋大業三年煬帝在榆林突厥啓人及西域東胡  
君長並來朝貢帝欲示以甲兵之盛乃命有司陳冬狩  
之禮詔虞部量拔延山南北周二百里並立表記前狩  
二日兵部建旗於表所五里一旗分為四十軍軍萬人  
騎五千匹前一日諸將各帥其軍集於旗下鳴鼓後至  
者斬詔四十道並揚旗節分中廻令即留軍所監獵布  
圍圍南面方行而前帝服紫袴褶黑介幘乘闌豬車

車飾

如木輅重輶綳輪屑龍繞  
轂漢東京由薄所謂獵車

駕六黑騮太常陳鼓笳鐃簫

角於帝左右各一百二十官戎服騎從鼓行入圍諸將  
並鼓行赴圍乃設驅逆騎千有二百關豬軻有司歛大  
綏王公以下皆整弓陳於駕前有司又歛小綏乃驅獸  
出過於帝前待詔再驅過至備身將軍奉進弓矢三驅  
過帝乃從禽鼓吹皆振左而射之每驅必三獸以上帝  
發抗大綏次王公發抗小綏次諸侯發射則無鼓驅逆  
之騎乃止然後四夷百姓皆獵凡射獸自左膘而射達

於右隅

五口反

為上等達右耳本為次等自左驛達於右

髓為下等羣獸相從不得盡殺已傷獸不得重射又逆  
向人者不射其面出表者不逐之田將止虞部建旗於  
圍內從駕之鼓及諸軍之鼓俱振卒徒皆譟諸獲禽者  
獻於旗所致其左耳大獸公之以供宗廟使歸腊於京  
師小獸私之○大唐高祖武德五年十二月幸涇陽之  
華池校獵謂羣臣曰今日畋樂乎諫議大夫蘇代長進  
曰陛下遊獵薄廢萬機不過十旬未為大樂高祖色變

既而笑曰狂發耶代長曰為臣私計即狂為陛下國計  
即忠貞觀十六年十二月狩於驪山時陰寒晦冥圍兵  
斷絕上乘高遙見之欲捨其罰恐虧軍令乃迴轡入谷  
以避之永徽元年冬出獵在路遇雨因問諫議大夫谷  
那律曰油衣若為不得漏對曰能以瓦為之必不漏矣  
上大悅因此不復出獵先天元年十一月獵於驪山之  
下侍中魏知古上詩諫曰嘗聞夏太康五子訓禽荒我  
后來冬狩三驅盛禮張順時鷹隼擊講事武功揚奔  
走未及去羣飛豈暇翔飛熊從渭水瑞翟想陳倉此欲  
誠難縱茲遊不可常子雲陳羽獵僖伯諫漁棠得失鑒

齊楚仁恩念禹湯雍熙諒在宥亭毒匪多傷辛甲今為  
決虞箴遂孔彰手制曰所進十韻三復研精良增歎美  
予時因暇景為苗而畋開一面之羅展三驅之禮無情  
校獵但慕前禽卿有箴規輔予不逮今賜物五千段用  
勸

開元三年十月大蒐於岐州鳳泉湯屬夜雪天寒  
其圍兵並放散各賜布一端綿一屯其蒐狩之制具開  
元禮

### 出師儀制

揚兵講武附○周 漢 後漢 魏 北齊 隋 晉 東晉 宋

大唐

周制大司馬制軍詰禁以糾邦國若大師則掌其戒令

涖太卜帥執事涖釁主及軍器

大師王出征伐也涖臨也主謂遷廟之主及社

主在軍者也軍器鼓鐸之屬凡師既受甲迎主於廟及社主祝奉以從殺牲以血塗主及軍器皆神明之司馬

法曰上卜下及致建太常比軍衆誅後至者致謂鄉師致民於司

馬也比司兵掌五兵五盾五兵者戈殳戟酋矛夷矛五盾者干櫓之屬也及授

兵從司馬之法以頒之師旅卒兩人數所用多少司戈盾掌戈盾之

物而頒之分與受用之授貳車戈盾建乘車之戈盾授旅賁

及虎士之戈盾車行兵車不式尚威武不崇敬武車綏旌武車亦革

路也取其建武即云兵車取其威猛即凡軍旅會同合云武車旌謂車上旗猶也綏謂垂舒

其車之卒伍而比其乘屬其右

合比屬謂次第相安習也車亦有卒伍

戎

僕掌馭戎車掌倅車之政正其服犯輶如玉輅之儀虎

賁氏掌先後王而趨以卒伍

王出將虎賁士居前後雖羣行亦有局分

旅賁

氏掌執戈盾夾王車而趨左八人右八人車止則持輪

太僕則自左馭而前驅及替王鼓

王通鼓佐擊其餘面

前有水則

載青旌前有塵埃則載鳴鳶前有車騎則載飛鴻前有

士師則載虎皮前有摯獸則載貔貅

載謂舉旌首以警衆也禮居行師從

卿行旅從前驅舉此則士衆知有所舉各以其類象之  
青青雀水鳥也鳶鳴則天將風風生埃起鴻取飛有行

列也士師謂兵衆也虎取其有威勇貌貅亦擊獸書曰如虎如貌

行前朱鳥而後玄武

左青龍而右白虎招搖在上急繕其怒

以此四獸為軍陣象天也急猶

聖也繕讀曰勁又畫招搖星於旌旗上以起居堅勁進軍之威怒象天地也招搖星在北斗杓端主指者

退有度

度謂伐與步數

挈壺氏掌挈壺以令軍井挈轡以令舍

挈畚以令糧

鄭衆云挈壺以令軍井謂為軍穿井井成挈壺懸其上令軍中士衆皆望見知此下

有井壺所以盛飲故以壺表井挈轡以令舍亦懸於所當舍止之處使軍望見知當舍止於此轡所以駕舍故以轡表舍挈畚以令糧亦懸畚於其所當廩假之處令軍望見知當廩假於此下也畚所以盛糧之器故以畚表廩軍中人多車騎雜會謹囂號令不能相聞故各以其物為表省煩便事也

凡軍事懸壺以

序聚橐

鄭衆云懸壺以為漏以序聚橐以次更聚橐橐備守鄭玄謂擊橐兩木相敲行夜時也橐音託

及戰司馬巡陣視事而賞罰

事謂戰功也

若師有功則左執

律右秉鉞以先愷樂獻於社

功勝也律所以聽聲鉞所以為將威也先猶導也兵

樂曰愷獻功於社也故城濮之戰

若師不功則厭而奉

春秋左氏傳曰振旅愷以入於晉

主車

鄭衆云厭謂厭冠喪服也軍敗則以喪禮故秦伯之敗於穀也春秋傳曰秦伯素服郊次向師而哭

鄭玄謂厭伏冠也奉猶

王弔勞士庶子則相

弔師散王親弔士庶子

送也送主歸於廟與社

之死者勞其傷者庶子卿大夫子之從軍者或謂之庶士

○漢興設南北軍之備外

命天下郡國選能引強蹶張材力武猛者以為輕車騎

士材官樓船常以立秋後郊禮畢斬牲於東門以薦陵  
廟肆孫吳兵法六十四陣每十月都課試金革騎士各  
有員數如有寇警平地用車騎山阻用材官水泉用樓  
船孝文納晁錯之策以為軍之勝負定於內有事則可  
以應於外頗祖周司馬法齊寄政之制

管子寓軍令

徙人於

邊以起軍伍元帝用貢禹議始罷角抵戲○後漢初立  
秋之日自郊禮畢始揚威武斬牲於郊東門以薦陵廟  
兵儀乘輿御戎輅白馬朱鬣躬執弩射牲

牲用鹿麋

太宰令

謁者各一人載以獲車馳驛送陵廟還宮遣使者齎束帛以賜武官肄兵習戰陣之儀斬牲之禮名曰驅劉兵官皆肄孫吳兵法六十四陣既還公卿以下陳雒陽街乘輿到公卿已下拜天子下車公卿親識顏色然後還宮靈帝中平五年以天下黃巾賊起大發四方兵講武耀兵於平樂觀以小黃門蹇碩為上軍校尉武賁中郎將袁紹為中軍校尉屯騎校尉鮑鴻為下軍校尉議郎曹操為典軍校尉趙融為助軍左校尉馮芳為助軍右

校尉諫議大夫夏年為左校尉淳于瓊為右校尉凡八人皆統於碩起太壇上十二重五采華蓋高十大壇東北為小壇復建五采華蓋高九大列步騎軍士數萬人結營為陣天子親出臨軍駐大華蓋下大將軍何進駐小華蓋下禮畢帝躬擐甲介馬稱無上將軍行陣三匝還獻帝建安二十一年有司奏古四時講武按漢西京承制三時不講唯十月都試金革今兵戈未偃士衆素習可無四時講武但以立秋擇吉日大朝車騎號曰閱

兵上合禮名下承漢制是冬閱兵魏王曹操親執金鼓以令進退延康元年曹丕嗣魏王其年秋閱兵於郊公卿相儀王御華蓋親執金鼓之節○魏明帝太和元年十月閱兵於東郊○晉武帝太始四年九月咸寧元年太康四年六年冬皆自臨宣武親大閱習衆軍然不自令進退自惠帝以後其禮遂廢○東晉元帝詔左右衛及諸營教習依大習儀成帝咸和中詔內外諸軍戲於南郊之場故其地因名閱場自後蕃鎮桓庾諸方伯往

往閱習然後朝廷無事焉○宋文帝依故事肄習衆軍  
兼用漢魏之禮其後以時講武於講武堂○後魏明帝  
永興元年九月十月之交親行驅劉之禮孝成帝和平  
三年因歲除大讌遂耀兵示武更為制令步兵陳於南  
騎士陳於北各擊鍾鼓以為節度其步兵所衣青赤黑  
黃別為部隊楯稍矛戟相次周迴轉易以相赴就有飛  
龍騰蛇之變為函箱魚鱗四門之陣凡十餘法跪起前  
却莫不應節陣畢南北二軍皆鳴鼓角衆盡大譟各令

騎將六千人去來挑戰步兵更進退以相拒擊南敗北  
捷以為威觀自後以為常○北齊常以季秋皇帝講武  
於都外有司先芟萊野為場為二軍進止之節輿駕停  
觀遂命將教衆為戰場之法凡為陣少者在前長者在  
後其還則長者在前少者在後長者持弓矢短者持旌  
旗勇者持鉦鼓刀楯為前行戟槊者次之弓箭為後行  
將帥先教士目使習見旌旗指麾之蹤發起之意旗卧  
則跪次教士耳使習聽金鼓動止之節聲鼓則進鳴金

則止次教士心使知刑罰之苦賞賜之利次教士手使習持五兵之便戰鬪之備次教士足使習跪起及行嶮泥之塗前五日皆請兵嚴於場所依方色建旗為和門都墀之中及四角皆建立五綵牙旗應講武者各集於其軍戒鼓一通軍士皆嚴備二通將士擐甲三通步軍各為直陣以相俟大將各處軍中立旗鼓下有司陳小駕鹵簿皇帝武弁乘革輅大司馬介冑乘馬奉引入行殿百司陪列位定二軍迭為客主先舉為客後舉為主

從五行相勝法為陣以應之○隋大業七年征遼東衆

軍將發御臨朔宮親授節度每軍大將亞將各一人騎

兵四十隊隊百人

百人置一纛十隊為一團團有偏將一人第一團皆青絲連光甲鐵具裝

青纓拂建狻猊旗第二團絳絲連珠犀甲獸文具裝赤纓拂建貔貅旗第三團白絲連明光甲鐵具裝素纓拂建辟邪旗第四團烏絲連玄犀甲獸文具裝建六駸旗前部鼓吹一部大鼓小鼓及鼙長鳴中鳴等各十八具桐鼓金鉦各二具後部鈇吹一部鈇二面歌簫及笳各四具節鼓一面鼙篳篥笛各四具大角十八具

步卒八十隊分為四團團有偏將一人

第一團每隊給青隼盪幡一第

二團每隊給黃隼盪幡一第三團每隊給蒼隼盪幡一第四團每隊給烏隼盪幡一長槊楯弩及甲氍等各稱

兵受降使者一人

給二馬輜車一乘白獸幡及節每

數

一騎吏三人車輻白從十二人

承

詔慰撫不受大將制戰陣則為監軍軍將發候大角一通步卒第一團出營東門東向陣第二團出營南門南向陣第三團出營西門西向陣第四團出營北門北向陣陣四面團營然後諸團嚴駕立大角三通則鐃鼓俱振第一團引行隊間相去各十五步次第二團次前部鼓吹次弓矢一隊合二百騎建蹲獸旗砲槩二張大將在其次韃馬二十四次大角次後部鐃吹次第三團次

第四團次受降使者次及輜重戎車散兵等亦有四團  
第一輜重出收東面陣分為兩道夾以行第二輜重出  
收南面陣夾以行第三輜重出收西面陣夾以行第四  
輜重出收北面陣夾以行亞將領五百騎建騰豹旗殿  
軍後至營則第一團騎陣於東面第二團騎陣於南面  
鼓吹翊大將軍居中駐馬南向第三團騎陣於西面第  
四團騎陣於北面合為方陣四面外向步卒翊輜重入  
於陣內以次安營定四面陣者引入營亞將率驍騎遊

奕督察其安營之制以車外布間設馬槍次施兵幕內  
安雜畜事畢大將亞將等各就牙帳馬步陣與軍中散  
兵交為兩番五日而代於是每日遣一軍發相去四十  
里連營漸進二十四日續發而盡首尾相繼鼓角相聞  
旌旗亘九百六十里天子六軍次發兩部前後先置又  
亘八十里通諸道合三十軍亘千四十里諸軍各以帛  
為帶長尺五寸濶二寸題其軍號為記御營內者合十  
衛三臺五省九寺並分隸內外前後左右六軍亦各題

其號不得自言臺省王公以下至於兵馬私隸悉以綴於衣領名軍記帶諸軍並給幡數百有餘事使人交相去來執以行執幡而離本軍者他軍驗記帶知非本部兵則所在斬之○大唐顯慶二年十一月二十一日講武於涇水之南行三驅之禮上設次於尚書臺以觀之

時許州長史封道弘奏言後漢南郡太守馬融講尚書於此因為名今請改為講武臺從之

五年三

月八日又講武於并州城北上御飛閣羣臣臨觀之左衛大將軍張延師為左軍左右驍武等六衛左羽林騎

士屬焉左武侯大將軍梁建方為右軍左右威領武侯等六衛右羽林騎士屬焉一鼓而誓衆再鼓而整列三鼓而交前左為曲直圓銳之陣右為方銳直圓之陣三挑而五變步退而騎進五合而各復位許敬宗奏曰延師整而堅建方敢而銳皆良將也上曰講閱者安不忘危之道也梁朝衣冠甚盛人物亦多侯景以數千人渡江一朝瓦解武不可黷人不可棄此之謂也武太后聖歷二年欲以李冬講武有司延入孟春時王方慶上疏

曰謹按禮記月令孟冬之月天子命將帥講武習射御  
角力此乃三時務農一時講武蓋王者常事安不忘危  
之道也孟春之月不可稱兵兵者干戈甲冑之總名兵  
金也金性尅木春盛德在木金氣以害盛德逆生氣孟  
春行冬令則水潦為敗雪霜大摯首種不入按蔡邕月  
令章句太陰休少陽尚微而行冬令以導水氣故水潦  
至而敗生物也雪霜大摯折傷者也太陰干時雨雪而  
霜故傷首種

種謂宿麥也麥以秋種故謂之首種入收  
也為沍寒所傷故至春不長今月令首種

稷非

今孟春講武是行冬令以陰故犯陽氣害發生之

德臣恐水潦敗物雪霜損稼宿麥不登無所收入也請  
至明年孟冬教習以順天道從之先天二年十月十二  
日講武於驪山之下征兵二十萬戈鋌金甲照耀天地  
列大陣於長川坐作進退以金鼓之聲節之元宗親擐  
戎服持大鎗立於陣前兵部尚書郭元振以虧失軍容  
坐於纛下將斬之宰臣劉幽求張說跪於馬前諫曰元  
振翊戴上皇有大功於國雖違軍令不可加刑伏願寬

宥乃捨之配流新州給事中知禮儀唐紹以草軍儀有

失斬之

上既怒唐紹衆情猶冀寬之會右金吾將軍李邕遽請斬之時人皆痛惜紹而深咎邕尋有制

罷邕官遂擯廢終身

薛納為左軍節度衆以元帥及禮官得罪諸

節部頗亦失序唯納及解琬軍不動上令輕騎召納等至軍門不得入禮畢特加慰勞

命將出征

漢

魏

北齊

後周

隋

大唐

漢高帝初為漢王都漢中將還定三秦擇良日齋戒設壇場具禮拜韓信為大將軍部署諸將東出陳倉收秦

地○魏故事遣將出征符節郎授節鉞跪而推轂○北齊命將出征則太卜詣廟灼龜授鼓旗於廟皇帝陳法駕服袞冕至廟拜於太祖徧告訖降就中階引上將操鉞授柯曰從上至天將軍制之又操斧授柯曰從下至泉將軍制之將軍既受斧鉞對曰國不可從外理軍不可從中制臣既受命有鼓旗斧鉞之威願假一言之命於臣帝曰苟利社稷將軍裁之將軍就車載斧鉞而出皇帝推轂度閭曰從此以外將軍制之○後周制大將

出征遣太祝以牛一祭所過名山大川明帝武成元年吐谷渾寇邊帝戎服乘馬遣大司馬賀蘭祥討之告於太祖之廟司憲奉鉞進授大將拜受以授從者禮畢出甲兵○隋制皇太子親戎及將軍出師則以猱肫一釁鼓皆告祖廟授斧鉞訖不得反宿於家開皇八年晉王廣將伐陳內史令李德林攝太尉告於太廟禮畢命有司宜於社二十年太尉晉王廣又北伐突厥次河上禡祭軒轅黃帝以太牢制幣陳甲兵行三獻之禮○大唐

之制如開元禮

宣露布

後魏


隋

大唐

後魏每攻戰尅捷欲天下聞知乃書帛建於漆竿上名為露布自此始也其後相因施行○隋文帝開皇中詔太常卿牛弘撰宣露布禮及九年平陳元帥晉王以驛上露布兵部奏請依新禮集百官四方客使等並赴廣陽門外服朝衣各依其列內史令稱有詔在位者皆拜宣訖蹈舞者三又拜而罷○大唐每平蕩寇賊宣露布

其日守宮量設羣官次露布至兵部侍郎奉以奏聞仍  
集文武羣官客使於東朝堂中書令宣布具如開元禮

武德元年十一月秦王平薛仁果凱旋獻於太廟二年  
五月秦王破宋金剛復并州故地凱旋獻捷於太廟四  
年七月秦王平東都被黃金甲陳鐵馬一萬甲士三萬  
以王世充竇建德及隋文物輦輅獻捷於太廟貞觀四  
年三月李靖俘頡利可汗獻捷於太廟永徽元年九月高侃執車鼻可汗獻於太廟



通典卷七十六

欽定四庫全書

史部  
通典卷八十一至

詳校官侍郎<sub>臣</sub>李封

編修<sub>臣</sub>程嘉謨覆勘

覆校官助教<sub>臣</sub>吳省蘭

校對官助教<sub>臣</sub>金學詩

謄錄監生<sub>臣</sub>汪存堦

欽定四庫全書

通典卷七十七

唐 京兆杜佑 君卿纂

禮三十七 軍二

天子諸侯大射鄉射

周大

漢

晉

宋

北齊

自黃帝有天下建萬國爰至夏商及於周氏雖更相吞滅而不改舊規周初諸侯尚千八百國所以崇三射之制立五善之目於茲選士由此封侯本在戡敵實寓大

政周衰禮多亡失重以秦滅典墳天子之禮無聞諸侯  
二篇而已誠與今異此畧存古制焉周制天子之大射

天官司裘供虎侯熊侯豹侯設其鵠

虎侯王之自射熊侯諸侯所射豹侯

卿大夫以下所射雀靈恩云若有二王助祭則天子與共射之若時無則與諸侯共為耦也

夏官射

人以射法理射儀王以六耦射三侯三獲三容樂以騶

虞九節五正諸侯以四耦射二侯二獲二容樂以貍首

七節三正孤卿大夫以三耦射一侯一獲一容樂以采

蘋五節二正士以三耦射豻侯一獲一容樂以采繁五

節二正

三侯者五正三正二正之侯也二侯者三正二正之侯也一侯者二正而已此皆與賓射於朝

之禮也考工梓人職曰張五采之侯則遠國屬遠國謂諸侯來朝用五采之侯即五正之侯也正之言正也射者內志正則能中焉畫五正之侯中朱次白次蒼次黃次玄居外三正去元黃二正去白蒼而畫以朱綠其外之廣皆居侯中三分之一中二尺今儒家云四尺曰正二尺曰鵠鵠乃用皮其大如正此說失之矣豸胡犬也士與士射以豸皮飾侯下大夫也大夫以上與賓射飾侯以雲氣用采各如其正九節七節五節者奏樂以為射節之差言節者容侯道之數也樂記曰明乎其節之志不失其事則功成而德行立豸音岸

射則以豸步張三侯

鄭司農云豸步謂一舉足為一步於今為半步鄭玄謂豸善搏者也

行則止而擬度焉其發必復是以量侯道法之也侯道者各以弓為度九節者九十弓七節者七十弓五節者

五十弓弓之下制長六尺大射禮曰大侯九十參七十  
豻五十是也三侯者司表所供虎侯熊侯豹侯也列國  
之君大射亦張三侯數與天子同大侯熊侯也參  
讀曰糝糝雜也雜者豹鵠而麋飾下天子大夫  
冬官

梓人為侯廣與崇方三分其廣而鵠居一焉

崇高等也高方

廣等者謂侯中也大射以皮飾侯天子射禮以九為節  
侯道虎侯九十弓熊侯七十弓豹侯五十弓侯中之  
大小取數於侯道鄉射記曰弓二寸以為侯中則天子  
九十弓侯中廣丈八尺七十弓者侯中廣丈四尺五十  
弓者侯中廣丈也尊卑異等此數明矣以侯中丈八尺  
者鵠方六尺侯中丈四尺者鵠方四尺六寸大半寸侯  
中一丈者鵠方三尺三寸少半寸也天子賓射於五采  
之侯侯方外如鵠內二尺五采者朱白蒼黃黑其侯之  
飾又以五采畫雲氣馬五采之侯即謂五正之侯也其  
廣皆居侯中三分之一中二尺然則五正之侯中方六

尺朱方二尺者則餘四色所畫各五寸也又畫上兩個其正外以雲氣為餘廣狹亦如大射皮餘之法

與其身三下兩個半之

下個讀如齊人櫓公幹之幹上個下個皆舌也身躬也鄉射禮記

曰倍中以為躬倍躬以為左右舌下舌半上舌然則九節之侯身三丈六尺上個七丈二尺下個五丈四尺其制身夾中个夾身在上下各一幅此侯凡用布三十六丈言上个與其身三者明身居一分上个倍之耳亦為下个半上个出也个或謂之舌者取其出而左右也侯制上廣下狹蓋取象於人也張臂八尺張足六尺上綱與下綱出舌尋緼寸焉

綱所以繫侯於植者也上下皆出舌一尋者亦人張手足

之節也鄭衆云綱連侯繩也緼綱者舌維持侯者緼音云

凡侯天子熊侯白質諸

侯麋侯赤質大夫布侯畫以虎豹士布侯畫以鹿豕

此所

謂獸侯也。燕射則張之白質赤質，皆謂采其地不采者。白布也。熊麋虎豹鹿豕皆正面畫其象於鵠之處耳。君畫一，臣畫二，陽奇陰耦之數也。燕射熊侯、虎豹，不忘上下相犯射麋鹿豕，志在君臣相養。畫其毛物，天子射熊，熊者巧猛之獸；侯人之象，天子德勝服巧猛之人。諸侯射麋，麋者迷也。象臣有迷惑，其君當誅之。卿大夫射虎，豹者當為君禦四方之難，示服猛害也。射鹿豕者，食人禾稼，士賤為除害而已。夏官司弓矢掌

六弓四弩八矢之法。仲春獻弓，弩仲秋獻矢。箛弓弩成於和矢

箛成於堅，箛盛矢以獸皮為之。

及其頒之王弓、弧弓，以授射甲革楯。

質者，夾弓庾弓，以授射豸侯鳥獸者。唐弓、大弓，以授學。

射者，使者勞者。

王弧，夾庾唐大六者弓異體之名。往體寡來體多。曰王弧往體多來體寡，曰夾。

庾往體來體若一曰唐大甲革革甲也春秋傳曰蹲甲而射之質正也樹樵以為射正也射甲與樵試弓習武也射侯五十步及射鳥獸皆近射也近射用弱弓則射大侯者用王弧射三侯者用唐大矣學射者弓用中後習強弱則易也使者勞者弓亦用中遠近可也勞者勤勞王事若晉文侯文公受王弓矢之賜者其矢

箛皆從其弓

從弓數也每弓一箛百矢

凡弩夾庾利攻守唐大利車

戰野戰

攻城壘者與其自守者相迫近弱弩發疾車戰野戰進退非強則不及弩無王弧王弧恒服弦

往體少者使矢不疾

凡矢枉矢絜矢利火射用諸守城車戰殺矢

鏃矢用諸近射田獵矰矢第矢用諸弋射恒矢庠矢用

諸散射

此八矢者弓弩各有四焉枉矢殺矢矰矢恒矢弓所用也絜矢鏃矢第矢庠矢弩所用也枉矢

者取名變星飛行有光今之飛矛是也或謂之兵矢繫矢象焉二者皆可結火以射敵守城車戰前微重後微輕行疾也殺矢言中矢則死鏃矢象焉鏃之言候也二者皆可以伺候射敵之近者及禽獸前尤重中深而不可遠也結繳於矢謂之矰矰高也箒矢象焉箒之言刺也二者皆可以弋飛鳥刺羅之也前微重後微輕行不低也詩云弋鳬與鴈恒矢安居之矢也庫矢象焉二者皆可以散射也謂禮射及習射也前後訂其行平也凡矢之制枉矢之屬五分二在前三在後殺矢之屬三分一在前二在後矰矢之屬七分三在前四在後恒矢之屬軒輶中訂

音亭輶音輕

天子之弓合九而成規諸侯合七而成規

大夫合五而成規士合三而成規勾者謂之弊弓

體往來之

衰也往體寡來體多則合多而圓往體多來體寡則合少而圓弊猶惡也勾者惡則直者善矣諸侯大

射之儀君有命戒射

諸侯將有祭祀之事與羣臣射以觀其體射中得與祭不中者不與

祭

前射三日司馬命量人量侯道與所設之以貍步大

侯凡九十糝侯七十豻侯五十

量人司馬之屬掌量塗數者量侯道謂去堂遠

近也貍之伺物每舉足止視遠近發必中也是以量侯道取象也

巾車張三侯大侯之

崇見鵠於糝糝見鵠於豻豻不及地武不繫左下網設

乏西十北十凡乏用革

巾車於天子宗伯之屬掌裝衣車者亦使張侯崇高也高必見

鵠所射之主

鄉射地官鄉大夫各掌其鄉之政正月之吉受

教法於司徒退而以鄉射之禮五物詢衆庶一曰和二

曰容三曰主皮四曰和容五曰興舞

以用也行鄉射之禮而以五物詢於

衆民也和載六德容包六行也庶民無射禮因田獵而分禽則有主皮主皮者張皮射之無侯也主皮和容興舞則六藝之射與禮樂與興舞謂發矢手如舞當射之時民必觀焉因詢之孔子射於矍相之圃蓋觀者如堵墻射至於司馬使子路執弓矢出誓射又使公罔之裘序點揚觶而語詢衆庶之儀若是君國中射

則皮樹中以翻旌獲白羽與朱羽糴

國中城中謂燕射也皮樹獸名中翻

旌獲尚文德

於郊則閭中以旌獲

於郊謂大射於大學王制曰小學在公宮南之左大

學在郊閭獸名大於驢一角或曰如驢蹄岐折羽為旌

於境則虎中以龍旌

於境謂與

隣國君射畫龍於旌尚文章也通帛為旌

大夫兕中各以其物獲

兕獸名似牛一角

士鹿中翻旌以獲

謂小國之州長也用翻為旌以獲無物

唯君子有射於

國中其餘否

臣不習武於君側

箭籌八十

箭篠也籌算也八十者畧以十耦為正也

貴全數也其時衆寡從賓

長尺有握握素

握手所持處也素刊之也刊本一云庸

楚朴

長如筭刊本尺

刊其所持處也筭古我反

幅長如筭博三寸厚寸有

半龍首其中蛇交韋當

博廣也兩端為龍首中央為蛇身相交蛇龍君子之類也交者

象君子取矢於福也直心背之衣曰當以丹韋為之

○漢石渠議曰鄉請射告主

人樂不告者何也戴聖曰請射告主人者賓主俱當射

也夫樂主所以樂賓也故不告於主人也宣帝甘露三

年三月黃門侍郎臨

失其姓

奏經曰鄉射合樂大射不樂

何也戴聖曰鄉射至而合樂者質也大射人君之禮儀多故不合樂也聞人通漢曰鄉射合樂者人禮也所以合和百姓也大射不合樂者諸侯之禮也韋玄成曰鄉射禮所以合樂者鄉人本無樂故合樂歲時所以合和百姓以同其意也至諸侯當有樂傳曰諸侯不釋懸明用無時也君臣朝廷固當有之矣不必湏合樂而後合故不云合樂也公卿以玄成議是○晉咸康五年春征

西庾亮行鄉射之禮依古周制親執其事洋洋然有洙泗之風○宋武帝為宋公在彭城九月九日出項羽戲

馬臺射其後相承以為舊準

或說云秋金之節講武習射象漢立秋之禮

○

北齊三月三日皇帝常服乘輿詣射所升堂即座皇太子及羣官坐定登歌進酒行爵皇帝入便殿更衣以出

驂騮令進御馬有司進弓矢帝射訖還御坐射懸侯又

畢羣官皆射五埒一品三十二發

一發調馬十發射下十五發射上三發射

鷹三發射獸頭

二品三品二十五發

一發調馬五發射下十發射上三發射鷹三發射帖

三發射獸頭

四品二十發

一發調馬六發射下八發射上二發射麋二發射帖一發射獸頭

五品十五發

一發調馬四發射下五發射上二發射麋二發射帖一發射獸頭

侍官御

仗以上十發

一發調馬四發射下五發射上

又季秋大射皇帝侍大駕

常服御七寶輦射七塲正三品以上第一塲一品五十

發

一發調馬十五發射下二十五發射上三發射麋三發射帖三發射獸頭

二品四十發

一發

調馬十二發射下二十發射上二發射麋餘與三品以下同

從三品四品第二塲三

品三十八發

一發調馬十二發射下十九發射上一發射麋二發射帖三發射獸頭

五品

第三塲三十二發

一發調馬九發射下十七發射上一發射麋二發射帖二發射獸頭

品第四埒二十七發

一發調馬八發射下十六發射上一發射麋一發射帖

七品

第五埒二十一發

一發調馬六發射下十二發射上餘與六品同也

八品第六

埒十六發

一發調馬四發射下九發射上餘同七品

九品第七埒十發

一發調馬

三發射下四發射上餘與八品同

大將

大尉公為之

射司馬各一人錄事二

人七埒各置埒將射正參軍各一人埒士四人威儀一

人乘白馬以導的別參軍一人懸侯下府參軍一人又

各置令史埒士等員以司其事○大唐之制皇帝射於

射宮則張熊侯射觀於射宮則張麋侯皆去殿九十步

太樂令設宮懸之樂鼓吹令設十二案於殿之庭若遊

宴射則不陳樂懸

貞觀元年太宗謂蕭瑀曰朕少好弓矢自謂能盡其妙近得良弓十數以

示弓工乃曰皆非良材也朕問其故曰木心不正則脉理皆邪弓雖剛勁而遣箭不直非良弓也朕始悟焉朕以弧矢定天下四方用弓多矣而有天下之日淺得為理之意故未及乎弓弓猶失之何況於理自是遂延耆老問以

三月三日九月九日賜百僚射

自貞觀至麟德七年行三月之

射行九月之射其禮遂至景雲二年諫議大夫源乾曜上表請行射禮直至先天元年二年

開元八

年九月九日賜百官射給事中許景先駁奏曰近三九

之辰頻賜宴射已著格令猶降綸音但古制雖在禮章

多闕官員累倍帑藏未充水旱相仍繼之師旅既不以  
觀德又未足威邊耗國損人且為不急夫古天子以射  
選諸侯以射飭禮樂以射觀容志故有騶虞貍首之奏  
采蘋采蘩之樂天子則以備官為節諸侯以時會為節  
卿大夫以循法為節士以不失職為節皆審志固行德  
美事成陰陽克和暴亂不作故諸侯貢士亦試於射宮  
容體有虧則黜其地是以諸侯君臣皆盡志於射射之  
禮也其大矣哉今則不然衆官既多鳴鏑亂下以苟獲

為利以偶中為能素無五善之容頗失三侯之禮凡今  
一箭偶中是費一丁庸調用之既無惻隱獲之固無慙  
色疏奏罷之至二十一年八月勅下大射展禮先王初  
儀雖沿革或殊而遵習無曠往有陳奏遂從廢寢永鑒  
大典無忘舊章將射侯以觀德豈愛羊而去禮緬惟古  
訓罔不率由自我而闕何以示後其三九射禮即宜依  
舊遵行以今年九月九日賜於安福樓下自此以後其禮又息  
射侯儀具開元禮○說曰按易庖犧氏弦木為弧剡木

為矢弧矢之利以威天下射義曰男子生以桑弧蓬矢

六射天地四方天地四方者男子之所有事也

男子生設弧於

門左三日負之人為之射乃卜食子者

是故周制諸侯歲獻貢士於天子

天子試之射宮其容體比於禮其節比於樂而中多者

得與於祭數與於祭而君有慶益以地其容體不比於

禮其節不比於樂而中少者不得與於祭數不與祭而

君有讓削以地是以諸侯君臣盡志於射以習禮樂天

子將祭必先習射於澤

澤謂澤宮

澤者所以擇也又曰射之

為言者繹也繹者各繹已志也故心平體正持弓矢審

固則射中矣射有三焉一曰大射

以其事大禮重故謂之大射

天子

將有郊廟之事與其來朝諸侯及畿內諸侯王之子弟

卿大夫士及諸侯所貢之士行之三公將有宗廟之事

與其卿大夫士及公之子弟卿大夫所選鄉中之俊者

行之孤卿大夫將有已宗廟之事亦率其家臣而行之

二曰賓射謂列國諸侯來朝於王或諸侯自相朝聘或

孤卿以下禮賓而射謂之賓禮皆行之於朝或行於廟

三曰燕射天子諸侯無事之日燕息縱適或燕勞來朝聘使之賓或復自與已臣共相勞息若天子諸侯之射則先行燕禮以明君臣之義卿大夫則先行鄉飲之禮以明長幼之序夫三射者貴其容體比於禮其節合於樂故謂之禮射其樂天子以騶虞為節諸侯以貍首為節卿大夫以采蘋為節士以采蘩為節騶虞者樂官備也貍首者樂會時也采蘋者樂循法度也采蘩者樂不失職也故明乎其節之志以不失其事則功成而德行

立無暴亂之禍而國家安故曰射者所以觀盛德也

樂官

備者騶虞詩云一發五豝喻賢衆多也樂會時者狸首詩云小大莫處御於君所樂循法度者采蘋詩云予以采蘋南澗之濱循澗以采蘋喻循法度以成君事也樂不失職者采蘋詩云被之僮僮夙夜在公白虎

通云天子射百二十步諸侯九十步大夫七十步士五十步所以明尊者所服遠卑者所制近也按鄭玄說射禮入嘉禮今按五帝三王之時天下萬國迭相征伐士之志藝以射為首是以我國家開元中修五禮以射禮入軍禮焉古者天子之大射曰射侯者射中則能服諸

侯以下中之則為諸侯是以諸侯君臣盡志於射以習  
禮樂而以流亡者未之有也

流放也書曰流其  
工於幽州者是也

孔子曰

君子無所爭必也射乎揖讓而升下而飲其爭也君子  
斯之謂歟

通典卷七十七

欽定四庫全書

通典卷七十八

唐京兆杜佑君卿纂

禮三十八 軍三

天子合朔伐鼓

諸侯附○夏周漢後漢魏晉東晉宋齊北齊

大唐

夏書曰乃季秋月朔辰弗集于房

辰日月所會房所舍之次集會也不會則

日蝕 瞽奏鼓嗇夫馳庶人走

凡日蝕天子鼓於社責上公也瞽樂官樂官進鼓則

伐之嗇夫主幣之官馳取幣禮天神○周制曰日有蝕也庶人走共救日蝕庶人百役之人

之天子不舉樂素服置五麾陳五鼓五兵及救日之弓

矢又以朱絲繫社而伐鼓責之

或曰脅之或曰為暗恐人犯之日蝕者陰侵陽

社者衆陰之主鼓配陽也以陰犯陽故鳴鼓而救之

夏官太僕掌軍旅田役贊王

鼓日月蝕亦如之

王通鼓佐擊其餘面

曾子問曰諸侯旅見天子

入門不得終禮而廢者幾孔子曰四太廟火日蝕后之

喪雨霑服失容則廢如諸侯皆在而日蝕則從天子救

日各以其方色與其兵也

示奉時事有所討也方色者東方衣青南方衣赤西方衣

白北方衣黑  
其兵未聞曾子問曰當祭而日蝕太廟火其祭也如

之何孔子曰接祭而已如牲至未殺則廢  
接祭不迎尸諸侯

救日蝕置三麾陳三鼓三兵用幣於社伐鼓於朝  
魯昭公十

七年六月朔日蝕叔孫昭子曰日蝕諸侯用幣於社上公代鼓於朝退自責大夫擊門士擊

柝  
言衛其隅曾子問曰諸侯相見揖讓入門不得終禮廢者

幾孔子曰六天子崩太廟火日蝕后夫人之喪雨露服

失容則廢○漢制天子救日蝕素服避正殿陳五鼓五

兵以朱絲繫社内外嚴警言太史登靈臺候日月有變便

伐鼓太僕贊祝史陳辭以責之聞鼓音侍臣皆著赤幘帶劔入侍三臺令史以上皆持劔立其戶前衛尉驅馳繞紫察守備日復常皆罷

此義摯虞決疑注云約魯昭公時叔孫昭子說天子數日

之法○後漢制朔前後各二日牽羊酒至社下以祭日日

有變割羊以祠社用救日日變執事冠長冠衣帛單衣絳領袖綠中衣絳緣以行禮如故事獻帝初平四年正月當祠南郊尚書八座議欲卻郊日又定冠禮而月朔日蝕博士孫瑞議按八座書以為正月之日太陽虧曜

謫見於天而冠者必有裸享之儀金石之樂飲燕之娛  
獻酌之報是為聞災不祇肅見異不怵惕也及建安中  
將元會而太史上言正朝當日蝕朝臣議應會不博平  
計吏劉邵建言曰梓慎禪竈古之良史猶占水火錯失  
天時禮諸侯見天子入門不得終禮者四日蝕在一然  
則聖人垂制不為異變先廢朝禮或災消異伏或推術  
謬誤時尚書令荀彧及衆人咸善而從之遂朝如舊日  
亦不蝕邵由此著名○魏高貴鄉公正元二年太史奏

三月一日寅時合朔去交二度恐相附近主者奏宣勅  
有司為救日蝕備既時過而不蝕大將軍曹爽推史官  
不驗之負空設合朔之期以疑上下光祿大夫領太史  
令邕言典歷者按歷術推交會之期候者伺遲疾之度  
當朔事無有違錯耳重問典歷周晃等對曰歷候所掌  
推步遲速可以知加時早晚度交緩急可以知薄蝕深  
淺合朔之時或以月掩日則蔽障日體使光景有虧故  
謂之日蝕或日掩月則日從月上過謂之陰不侵陽雖

交無變至於日月相掩必蝕之理無術以推是以古者諸侯旅見天子日蝕則廢禮嘗禘郊社日蝕則接祭是以前代史官不能審日蝕之數故有不得終禮自漢故事以為日蝕必當於交每至其時申警百官以備日變甲寅詔書有備蝕之制無考負之法侍中鄭小同議史官不務審察晷度謹綜疎密謬准交會以為其兆至乃虛設疑日大警外內其有不效則委於差晷度禁縱自由皆非其義按春秋昭公三十一年十二月辛亥日蝕

晉史墨以庚午之日日始有謫自庚午至辛亥四十二  
日日蝕之兆固形於前矣此為古有明法而今不察是  
守官惰職考察無效此有司之罪又答古來黃帝顓頊  
夏殷周魯六歷皆無推日蝕法但有考課疎密而已負  
坐之條由本無術可課非司事之罪乃止○晉武帝咸  
寧三年四年並以正朝合朔却元會○東晉元帝大興  
元年四月合朔有司奏議按春秋日有蝕之天子伐鼓  
於社攻諸陰也諸侯伐鼓於朝臣自攻也按尚書符若

日有變便擊鼓諸門有違舊典詔曰所陳有正義改之  
至康帝建元元年太史上元日合朔後復疑應却會與  
不庾冰輔政寫劉邵議以示八座蔡謨著議非之曰邵  
論災消異伏又以竈慎猶有錯失太史上言亦不必審  
其理誠然也而云聖人垂制不為變異先廢朝禮此則  
謬矣災祥之發所以譴告人君王者之所重誠故素服  
廢樂退避正寢百官降物用幣伐鼓躬親救之夫警戒  
之事與其疑而廢之寧順而行之故孔子老聃助葬於

巷黨以喪不星行故日蝕而止柩曰安知不見星今史  
官言當蝕亦安知其不蝕夫子老聃先行見星之防而  
邵逆廢日蝕之戒是反聖賢之成規也魯桓公士申有  
災而以乙亥嘗祭春秋譏之災事既過追懼未已故廢  
宗廟之祭况聞天青將至而行慶樂之會於事乖矣禮  
記所云諸侯入門不得終禮者謂日官不先言諸侯既  
入見蝕乃知耳非先聞當蝕而朝會不廢也邵引此文  
失其義旨邵所執者禮記也夫子老聃巷黨之事亦禮

記所言復違而反之進退無據然荀或所善漢朝所從  
遂令此言至今見稱莫知其謬後來君子將以為準繩  
故正之云爾於是衆議從之穆帝永和中殷浩輔政又  
欲從劉邵議不却會王彪之議曰禮云諸侯旅見天子  
不得終禮而廢者四自謂卒暴有之非謂先存其事而  
僥倖史官推術錯謬故不先廢又從彪之議○宋因晉  
制○齊武帝永明元年十二月有司奏今月三日臘祠  
大社稷一日合朔日蝕既在致齋內未審於社祠無疑

不曾檢未有前準尚書令王儉議禮記曾子問天子嘗  
禘郊社五祀之祭簠簋既陳唯大喪乃廢至於當祭之  
日火及日蝕則停尋伐鼓用牲由來尚矣而簠簋初陳  
問所不及據此而言致齋初日乃但薄蝕則不廢祭按  
漢初平中博士孫瑞議以日蝕廢冠而不廢郊朝議從  
之王者父天母地郊社不殊此則前準謂不宜廢詔可  
○北齊制日蝕則太極殿西廂東向東堂東廂西向各  
設御座羣官公服晝漏上水一刻內外戒嚴三門者閉

中門者掩之蝕前三刻皇帝服通天冠即御座直衛如常不省事有變聞鼓音則避正殿就東堂服白袷單衣侍臣皆赤幘帶劔升殿侍諸司各於其所赤幘持劔出戶向日立有司各率官屬並行宮內諸門掖門屯衛大社鄴令以官屬圍社守四門以朱絲繩繞繫社壇三匝太祝令陳辭責社太史令二人走馬露版上尚書門司疾上之又告清都尹鳴鼓如嚴鼓法日光復乃止奏解嚴○大唐合朔伐鼓具開元禮

冬夏至寢鼓兵議

易曰先王以至日閉關商旅不行后不省方五經通議  
曰以冬至陽氣萌生陰陽交精始成萬物氣微在下不  
可動洩王者承天理物故率先天下靜而不擾也夏至  
陰氣始動而未達故亦寢兵鼓不設政事助微氣之養  
也晉劉遐議曰以為陽實君道是以微陽初興慶其方  
盛寢鼓息兵不欲震蕩也禮尊無二若當助陰豈一之  
義何以明之彼月而蝕則惟其常此日而蝕于何不減

月蝕無救之道明矣何熊以為二節陰陽升降之極會  
通交代之日二氣既接剛柔始分君子遠慎諸物近慎  
諸已在冬欲靜在夏無躁百官靜事無刑以定寢鼓息  
兵其宜合同張侯曰冬夏二至慎微不異左傳曰凡分  
至啟閉必書雲物為備故也所重所慎於是在矣周禮  
太僕掌贊王鼓救日月亦如之左傳又曰月亦如之又  
曰非日月之青不鼓皆正經也日長則賀君父道也下  
慶上會情交接也日短則不賀臣子道也鼓以動衆是

以二至迎送同寢之也劉泓謂寢鼓不出經傳或以漢興日蝕陰盛擊鼓助陽則冬至助陽不應寢鼓也于瓚又云按漢制有冬至絕事不聽政之條而無夏至也以此推之夏至不應寢政事鄭瑤曰尋冬至寢鼓之義雖無正文恐有由耳夫天之德貴生惡殺冬至少陽初發萌芽之漸欲省事順動以應至道是以不省方事安能鳴鼓後代擬議寢之非為助陽也夏至少陰肇起殺氣自興否剝將至大戚方來宜有鳴鼓開闔興兵駭旅施

命四方誥其逆兆以遏小人方長之害二至之義否泰  
道異休戚有殊寢鼓之教不宜同也若以夏至俗人所  
重文武可息之一日不可前三後三等於冬至也

馬政

馬祭附○周

隋

大唐

周制夏官校人掌王馬之政

政謂差擇養乘之數也月令曰班馬政

天子

十有二閑馬六種種馬戎馬齊馬道馬田馬駕馬

種謂上善

似母者以次差之玉輅駕種馬戎輅駕戎馬金輅駕齊馬象輅駕道馬田輅駕田馬駕馬給宮中之役

邦

國六閑馬四種家四閑馬二種

降殺之差每廐為一閑諸侯有齊馬道馬田馬

家謂大夫有田馬各一閑其駑馬則皆分為三馬

凡頒良馬而養乘之乘馬一

師四圉三乘為皂皂一趣馬三皂為繫繫一馭夫六繫

為廐廐一僕夫六廐成校校有左右駑馬三良馬之數

麗馬一圉八麗一師八師一趣馬八趣馬一馭夫

良善也善

馬五輅之馬趣馬馭夫僕夫帥之名也趣馬下士馭夫中士則僕夫上士也自乘至廐其數二百一十六匹易乾為馬此應乾之策也至校變言成者明六馬各一廐而王馬小備也校有左右則良馬一種四百三十二匹五種合二千一百六十匹駑馬三之則為千二百九十匹五良一駑凡三千四百五十六匹然後王馬大備詩云駟牝三千此謂王馬之大數麗耦也駑馬自圉至馭夫凡馬千二十四匹與三良馬之數不相應八皆疑

為六字之誤也師十二匹趣馬七十二匹  
則馭夫四百三十二匹矣趣音倉走反  
趣馬掌贊正

良馬而齊其飲食簡其六節

贊佐也簡差也節量也

巫

馬掌養疾馬而垂治之相醫而藥攻馬疾受材於校人

垂謂驅步以發其疾所以知疾處乃治之牧師掌牧地皆有厲禁而頒之孟

春焚牧

焚牧地以除陳生新草

仲春通淫

仲春陰陽交萬物生之時可以合馬之牝牡按

月今季春乃合累牛騰馬遊牝於牧

馬質掌質馬馬量三物一曰戎馬二

曰田馬三曰駕馬皆有物賈

此三馬者賈以給官府之使無種也皆有物賈謂皆

有物色及賈直

凡受馬於有司者書其齒毛與其賈馬死則旬

之內更旬之外入馬耳以其物更其外否

旬之內死者償以齒毛與

賈受之日淺養之惡也旬之外死者入馬耳償以毛色不以齒賈任之過其任也其外否者旬之外踰二十日

而死者不任用非用者罪

**春祭馬祖執駒**

馬祖天駟也孝經說曰房為龍馬鄭衆云執駒無令

近母猶攻駒也二歲曰駒三歲曰駟鄭玄謂執猶拘也春通淫之時駒弱血氣未定為其乘匹傷之

**夏祭**

**先牧頒馬攻特**

先牧始養馬者其人未聞夏通淫之後攻其特為其蹄齧不可乘用鄭衆云攻

特謂驂之驂音繒

**秋祭馬社減僕**

馬社始乘馬者世本作曰相士作乘馬鄭衆云減僕謂簡

練馭者今皆善也鄭玄謂僕馭五輅之僕

**冬祭馬步獻馬講馭夫**

馬步神為災害馬者

獻馬見成馬於王也馭夫馭貳車從車使車者講猶簡習

**其餘祭大澤用仲月剛日**

甲庚丙壬戌為剛日  
乙丁辛癸巳為柔日  
○隋制常以仲春用少牢祭馬祖

於大澤諸合祭官於祭所致齋一日積柴於燎壇禮畢  
就燎仲夏祭先牧仲秋祭馬社仲冬祭馬步並於大澤  
皆以剛日牲用少牢如祭馬祖埋而不燎○大唐馬祭  
因隋之制其儀如開元禮

時儺

周

後漢

北齊

隋

大唐

周制夏官方相氏掌蒙熊皮黃金四目玄衣朱裳執戈  
揚楯帥百隸而時儺以索室毆疫

蒙冒也冒熊皮者以  
警毆疫厲之鬼如今

魃頭也時儼四時作方相氏以儼却凶惡也

月令季春命國儼九門磔攘以

畢春氣

洪範傳云言之不從則有犬禍犬屬金也故磔之於九門所以抑金扶木畢成春功東方三門

不磔春位不殺且盛德所在無所攘

仲秋天子乃儼以達秋氣

此儼儼陽氣也陽暑

至此不衰害亦將及人故儼以通秋氣方欲助秋故不磔犬

季冬命有司大儼旁磔

以送寒氣

大儼為歲終逐除陰疫以送寒氣旁謂王城四旁十二門也磔謂磔犬於門也春磔九門

冬禮大故徧磔於十二門所以扶陽抑陰之義也犬屬金冬盡春興為木故殺金以助木氣

○後漢

季冬先臘一日大儼

儼却

謂之逐疫

漢舊儀曰顓頊氏有三子生而亡為

疫鬼一居江水為虎一居若水是為魍魎蜮鬼一居人宮室區隅漚庾善驚人小兒月令章句曰日行北方之

宿北方大陰恐為所抑故命有司大儺所以扶其儀選  
陽抑陰也盧植禮記注云所以逐衰而迎新

中黃門子弟十歲以上十二以下百二十人為佺子皆

赤幘卓製執大鼗

漢舊儀曰方相氏帥百隸及童子以桃弧棘矢土鼓鼓且射之以赤丸五

穀播洒之譙周論語注曰以葦矢射之薛綜曰佺之言善善童幼子也佺音振方相氏黃金四

目蒙熊皮元衣朱裳執戈揚楯十二獸有衣毛角中黃

門行之冗從僕射將之以逐惡鬼於禁中夜漏上水朝

臣會侍中尚書御史謁者虎賁羽林郎將執事皆赤幘

陛衛乘輿御前殿黃門令奏曰佺子備請逐疫於是中

黃門唱俚子和曰甲作食死脾胃食虎雄伯食魅騰簡  
食不祥攬諸食咎伯奇食夢強梁祖明共食磔死寄生  
委隨食觀錯斷食巨窮奇騰根共食蠱凡使十二神追  
惡凶赫汝軀拉汝幹節解汝肉抽汝肺腸汝不急去後

者為糧

東京賦曰捐魑魅斲獠狂斬委蛇腦方良囚耕父於清冷溺女魑於神潢殘夔魑與罔象殪野

仲而殲游光注曰魑魅山澤之神獠狂惡鬼委蛇大如車轂方良草澤神耕父女魑皆旱鬼惡水故因溺於水中使不能為害夔魑罔象木石之怪野仲游光兄弟八人恒在人間作怪害也孔子曰木石之怪夔罔兩水之怪龍罔象劉昭曰木石山怪也夔一足越人謂之山獠罔兩山精好學人聲而迷惑人龍神物也非所常見故

曰怪罔象食人一名沐膈埤蒼曰獮狂  
無頭鬼委音虛獮音休律反埤避移反  
因作方相與十

二獸舞嚙呼周徧前後省三過持炬火送疫出端門

京東

賦曰煌火馳而星流逐赤疫於四裔注曰煌然火如星  
馳赤疫疫鬼惡者也偃子合三行從東序上西序下

門外騶騎傳炬出宮司馬闕門門外五營騎士傳火棄

雒水中

東京賦注曰衛士千人在端門外五營千騎在  
衛士外為三部更送至雒水凡三輩逐鬼投雒

水中仍上天池絕其  
橋梁使不得度還

百官官府各以木面獸能為儼人

師訖設桃梗鬱壘葦茭畢執事陞者罷

山海經曰東海  
中有度朔山上

有大桃樹蟠屈三千里其卑枝門曰東北鬼門萬鬼出  
入也上有二神人一曰神荼一曰鬱壘主閱領衆鬼之

惡害人者執以葦索而用食虎於是黃帝法而象之毆除畢因立桃梗於門戶上畫鬱壘持葦索以御凶鬼畫虎於當門食鬼葦戟桃枝以賜公卿將軍特進諸侯云是月也

立土牛六頭於國都郡縣城外丑地以送大寒

月令章句曰是

月之會建丑丑為牛寒將極是故出其物類形象以示送達之且以升陽也

○北齊制季冬

晦選人子弟如漢合二百四十人百二十人赤幘皐襦

衣執鼗鼓百二十人赤布袴褶執鞞角方相氏執戈揚

楯又作窮奇祖明等十二獸皆有毛角鼓吹令率之中

黃門行之冗從僕射將之以逐惡鬼於禁中其日戌夜

三唱開諸里門儺者各集被服器仗以待事戍四唱開  
諸城門二衛皆嚴上水一刻皇帝常服即御座王公執  
事官一品以下六品以上陪列觀儺者鼓譟入殿西門  
徧於禁內分出於上閣作方相與十二獸舞戲喧呼周  
徧前後鼓譟出殿南門分為六道出於郭外河清年中  
定令歲十二月半講武至晦逐除二軍兵馬右入千秋  
門左入萬歲門並永巷南下至昭陽殿北二軍交一軍  
從西上閣一軍東上閣並從端門南出閭闔門前橋南

戲射並訖送至城南郭外罷○隋制季春晦讎磔牲於  
宮門及城四門以攘陰氣秋分前一日攘陽氣季冬旁  
磔大讎亦如之其牲每門各用羝羊及雄雞一選僎子  
如北齊法冬八隊二時則四隊問事十二人赤幘襦衣  
執皮鞭工二十人其一人方相氏如周禮一人為唱師  
着皮衣執棒鼓角各十人有司素備雄雞羝羊及酒於  
宮門為坎未明呼鼓譟以入方相氏執戈揚楯周呼鼓  
譟而出合趣明陽門分詣諸城門將出諸司執事預囑

牲胄磔之

羈普  
逼反

於門酌酒禳祝舉牲并酒埋之○大唐

制季冬大儺及州縣儺禮並如開元禮

通典卷七十八